

MEH-Z-LOH. 默示录

Mz. I.

Yiæ-su Kyi-toh-go meh-z, z Jing-ming s-peh Gyi go, pô kw'a iao ing-nyien-go z-ken t'ong-cü Gyi-go *cong* nu-boh, ziu ts'a t'in-s kao-hyang Gyi-go nu-boh Iah-'en. ² Iah-'en pô Jing-ming-go shih-wô, teng Yiæ-su Kyi-toh-go te-tsing, teng zi sô k'en-kyin-go tso te-tsing. ³ Keh yü-sin kông-go shih-wô, doh-go cü-kwu teng keh-sing t'ing-meng *neng-keo* pao-siu gyi sô sia-lôh-tih cü-kwu yiu foh-ky'i: ing-we gyi-go z-'eo gying-de.

耶稣基督个默示，是神明赐拨其个，把快要应验个事干通知其个众奴仆，就差天使告向其个奴仆约翰。² 约翰把神明个说话，等耶稣基督个对证，等自所看见个做对证。³ 箇预先讲个说话，读个主顾等箇星听闻能够保守其所写落的主顾有福气。因为其个时候近了。

^{4, 5} Iah-'en *ta sing* peh Üô-si-üô di-fông ts'ih-go kyiao-we: Dæn-nyün keh yin-dzæ: zin-deo 'eo-deo *læ-tong-go*, teng Gyi-go zo-we min-zin ts'ih-go Ling, wa-yiu keh tso sing-jih te-tsing go, deo-ih si-ts tsæ weh-go, tso t'in-'ô keh-sing wông-ti-go Cü-tsæ Yiæ-su Kyi-toh, s-peh ng-lah eng-we bing-en. Z Gyi æ-sih ah-lah, yüong Zi-go hyüih gyiang-diao ah-lah-go ze, ⁶ lih ah-lah tso wông tso tsi-s læ Gyi Ah-tia Jing-ming-go min-zin: dæn-nyün yüong-wô gyün-ping shü-shü-dæ-dæ kwe peh Gyi. Üô-meng.

^{4, 5} 约翰带信拨亚西亚地方七个教会。但愿箇现在、前头、后头来东个，等其个座位面前七个灵，还有箇做信实对证个，头一死仔再活个，做天下箇星皇帝个主宰耶稣基督，赐拨尔拉恩惠平安。是其爱惜阿拉，用自个血澆掉阿拉个罪，⁶ 立阿拉做王做祭司来其阿爹神明个面前。但愿荣华权柄世代代归拨其。亚们。

⁷ Ts'ia-k'en Gyi zo-leh yüing ka læ: ko-tang-ko ngæn-tsing pih-ding k'en-kyin, ziu-z c'oh-sông Gyi go yia k'en-kyin: læ di-li go long-tsong dzoh-veng we-leh Gyi di-k'oh. Tsing-tsing z-go, Üô-meng. ⁸ Cü wô, “Ngô z ^[1]Üô-leh-pô teng O-mi-kyüô, z ky'i-deo teng kyih-sah,” yin-dzæ *læ-tong*, zin-deo *læ-tong*, 'eo-deo *læ-tong*, vu-sô-peh-neng-go.”

⁷ 且看，其坐勒云介来。个打个眼睛必定看见，就是戳伤其个也看见。来地里个拢总族份为了其啼哭。真正是个，亚们。⁸ 主话，「我是亚勒巴、等阿米加

[1], 是起头等结煞,」现在来东, 前头来东, 后头来东, 无所不能个。」

[1] 'Ôh sia; Ah-leh-fah teng O-meh-gah, ziu-z Hyi-lah ts'u-'ôh li-deo ky'i-deo teng kyih-sah keh liang-go ing-yüing. 或写, 阿勒法等阿末轧, 就是希腊初学里头起头等结煞箇两个音韵。
(原注)

⁹ Ngô Iah-'en z ng-lah-go hyüong-di, dô-kô ziu pih-næn, dô-kô næ-sing teng-dæ Yia-su Kyi-toh-go koh, we-leh Jing-ming-go dao-li teng Yia-su Kyi-toh-go te-tsing læ ih-go hæ-sæn, kyiao-leh Bah-mo. ¹⁰ P'ong-djôh Cü-nyih mong Sing-Ling ken-dong, t'ing-meng ngô 'eo-pe ziang 'ao-dong ka do-do sing-hyang, z-ka wô, ¹¹ “Ngô z ^[1]Üô-leh-pô teng O-mi-kyüô, ky'i-deo teng kyih-sah;” wa-yiu wô, “Ng hao pô sô k'en-kyin-go sia læ shü-li, ta peh Üô-si-üô ts'ih-go kyiao-we, ziu-z læ Yi-feh-sô, Z-me-nô, Bih-kyüô-mo, T'e-yüô-t'e-lah, Sah-dih, Fi-lah-t'ih-fi, Lao-ti-kyüô, keh-sing di-fông.” ¹² Ngô nyin-cün iao k'en-kyin kao-hyang ngô dao go sing-ing; ih nyin-cün k'en-kyin ts'ih-tsæn kying teng-dæ. ¹³ Ts'ih-tsæn teng-dæ cong-nyiang yiu ziang nying-go Ng-ts ka, c'ün-leh t'o-kyiah-min-go i-zông, hyüong-kwun-deo kyi-leh kying-ts-go ta. ¹⁴ Gyi-go deo teng deo-fah tu bah-bah-go, ziang yang-mao, ziang shih ka; Gyi-go ngæn-tsing ziang ho-kwông ka. ¹⁵ Gyi kyiah ziang ting hao dong, yi ziang ho-lu-li tön-ko-liao ka; Gyi-go sing-ing ziang do-shü-go sing-hyang ka. ¹⁶ Gyi-go jing-tsah siu do-leh ts'ih-lih sing; yiu fong-li-go pao-kyin dzong Gyi cü-pô c'ih-læ; Gyi min-k'ong ziang mang-mang nyih-deo tsiao-tong ka. ¹⁷ Ngô k'en-kyin, ziu boh-tao Gyi-go kyiah-'ô, ziang si-liao ka. Gyi jing-tsah siu en-en ngô, teng ngô wô, “Vong p'ô; Ngô z ky'i-deo kyih-sah læ-tong-go. ¹⁸ Ngô z weh-go, Ngô yia dzeng si-ko, næn-kæn weh tao üong-yün shü-dæ, Üô-meng; ping-ts'ia tsih-công si-go teng ing-kæn-go yiah-z. ¹⁹ Ng sô k'en-kyin-go, yin-dzæ teng tsiang-læ sô yiu-go, tu hao sia-lôh. ²⁰ Wa-yiu Ngô jing-tsah siu ng sô k'en-kyin keh ts'ih-lih sing-go ao-miao i-s, teng ts'ih-tsæn kying teng-dæ. Keh ts'ih-lih sing, z ts'ih kyiao-we-go s-ts'a: sô k'en-kyin-go ts'ih-tsæn teng-dæ, ziu-z ts'ih-go kyiao-we.

⁹ 我约翰是尔拉个兄弟, 大家受逼难, 大家耐心等待耶稣基督个国, 为了神明个道理等耶稣基督个对证来一个海山, 叫勒拔摩。¹⁰ 碰着主日蒙圣灵感动, 听闻我后辈像号筒介大大声响, 是介话, ¹¹ 「我是亚勒巴、等阿米加^[1], 起头等结煞。」还有话, 「尔好把所看见个写来书里, 带拨亚西亚七个教会, 就是来以弗所、士每拿、别迦摩、推雅推喇、撒狄、非拉铁非、老底嘉, 箇星地方。」

¹² 我扭转要看见告向我道个声音。一扭转看见七盏金灯台。¹³ 七盏灯台中央有像人个儿子介, 穿勒拖脚面个衣裳, 胸腕头系勒金子个带。¹⁴ 其个头等头发都白白个, 像羊毛, 像雪介。其个眼睛像火光介。¹⁵ 其脚像顶好铜, 又像火炉里锻过了介。其个声音像大水个声响介。¹⁶ 其个顺只手驮勒七粒星。有锋利个宝

剑从其嘴巴出来。其面孔像猛猛日头照东介。¹⁷ 我看见，就伏倒其个脚下，像死了介。其顺只手按按我，等我话，「甯怕。我是起头结煞来东个。¹⁸ 我是活个，我也曾死过，难间活到永远世代，亚们。并且执掌死个等阴间个钥匙。¹⁹ 尔所看见个，现在等将来所有个，都好写落。²⁰ 还有我顺只手尔所看见箇七粒星个奥妙意思，等七盏金灯台。箇七粒星，是七教会个使差。所看见个七盏灯台，就是七个教会。」

[1] 'Ôh sia; Ah-leh-fah teng O-meh-gah, ziu-z Hyi-lah ts'u-'ôh li-deo ky'i-deo teng kyih-sah keh liang-go ing-yüing. 或写，阿勒法等阿末轧，就是希腊初学里头起头等结煞箇两个音韵。
(原注)

Mz. II.

“Ng hao sia sing peh Yi-feh-sô kyiao-we-go s-ts'a, wô; 'Jing-tsah siu nyiah-leh ts'ih-lih sing, yi læ ts'ih-tsæn kying teng-dæ cong-nyiang tseo-go Cü-kwu z-ka wô,
² Ngô hyiao-teh ng sô tso-go, ng-go lao-loh, ng-go jing-næ, feh neng-keo kw'un-yüong ôh-nying; yiu zi wô tso s-du jih-we feh-z-go, ng yi-kying s-s-ko hyiao-teh gyi z kô-go; ³ ng jing-ky'i næ-sing, we-leh Ngô-go ming-deo lao-kw'u, feh we bi-gyün.
⁴ Dæn-z Ngô yiu ih-ying iao p'i-bing ng, ing-we yi-kying shih-diao ky'i-deo æ-sih-go sing. ⁵ Ng kæ ts'eng-tao dzong dza-go tih-lôh, kæ we-sing-cün-i, voh-cün ky'i-deo sô tso; ziah-z ng feh we-sing-cün-i, Ngô soh-soh we tao ng-go u-sen, pun-ko ng-go teng-dæ. ⁶ Dæn-z ng yiu ih-ying hao-c'ü, Nyi-ko-lah keh-tông 'ang-we, Ngô sô u-su-go, ng yia u-su. ⁷ Yiu ng-to go kæ t'ing Sing-Ling kao-hyang cong kyiao-we go shih-wô. Teh-sing-go cü-kwu, Ngô we pô Jing-ming foh-yün cong-nyiang weh-ming jü s-peh gyi ky'üoh.”

「尔好写信拨以弗所教会个使差，话：『顺只手捏勒七粒星，又来七盏金灯台中央走个主顾是介话，² 我晓得尔所做个、尔个劳碌、尔个忍耐、弗能够宽容恶人；有自话做使徒实为弗是个，尔已经试试过晓得其是假个；³ 尔忍气耐心，为了我个名头劳苦，弗会疲倦。⁴ 但是我有一样要批评尔，因为已经失掉起头爱惜个心。⁵ 尔该忖到从咋个跌落，该回心转意，复转起头所做；若是尔弗回心转意，我速速会到尔个乌碎，搬过尔个灯台。⁶ 但是尔有一样好处，尼哥拉箇党行为，我所恶愆个，尔也恶愆。⁷ 有耳朵个该听圣灵告向众教会个说话。得胜个主顾，我会把神明福园中央活命树赐拨其吃。』

⁸ “Tsæ hao sia sing peh Z-me-nô kyiao-we-go s-ts’a, wô; “Ky’i-deo, kyih-sah, si-ts yi weh-cün-læ-go Cü-kwu z-ka wô, ⁹ Ngô hyiao-teh ng sô tso, teng næn-c’ü ky’üih-siao; (ng jih-we fu-tsôh:) yiu-sing zi wô z Yiu-t’a nying, tsing-tsing feh-z, z Sah-dæn-go jü-we-dông, Ngô hyiao-teh gyi-lah z sih-doh-go shih-wô. ¹⁰ Ng tsiang-læ iao ky’üoh-go kw’u,” ih-ngæn hao-vong p’ô. Mo-kwe tang-tsiang pô ng-lah li-hyang kyi-go nying ky’ih-lôh kæn-li, peh gyi s-s, ziu jih-nyih-go næn-deo. Ng yüong siang-sing tao si, Ngô s-peh ng weh-ming-go bing-t’in-kwun. ¹¹ Yiu ng-to go kæ t’ing Sing-Ling kao-hyang cong kyiao-we go shih-wô. Teh-sing-go cü-kwu, di-nyi-tsao si feh neng-keo ‘æ gyi.’

⁸ 「再好写信拨士每拿教会个使差，话：『起头、结煞、死仔又活转来个主顾是介话，⁹ 我晓得尔所做、等难处缺少；（尔实惠富足；）有星自话是犹太人，真正弗是，是撒但个聚会堂，我晓得其拉是亵渎个说话。¹⁰ 尔将来要吃个苦，一眼好留怕。魔鬼打账把尔拉里向几个人掣落监里，拨其试试，受十日个难头。尔用相信到死，我赐拨尔活命个平天冠。¹¹ 有耳朵个该听圣灵告向众教会个说话。得胜个主顾，第二遭死弗能够害其。』

¹² “Tsæ hao sia sing peh Bih-kyüô-mo kyiao-we-go s-ts’a, wô; ‘Yiu fong-li pao-kyin go Cü-kwu z-ka wô, ¹³ Ngô hyiao-teh ng sô tso, teng ng sô deng, ziu-z Sah-dæn zo-we u-sen; ping-ts’ia Ngô cong-sing-go kyin-tsing En-di-p’ô be long-sah læ ng-lah cong-nyiang, Sah-dæn sô deng-go u-sen, keh z-’eo ng dzing-gyiu nyiah-ding Ngô-go ming-deo, yia m-neh ky’i-diao siang-sing Ngô go sing. ¹⁴ Dæn-z Ngô yiu ih-liang-nyiang iao p’i-bing ng; zin-deo Pô-læn kao Pô-lih s-teh Yi-seh-lih nying pæn-tih, ziu-z ky’üoh ngeo-ziang-go tsi-veh, tso kæn-ying z-ken, ng keh-deo yia yiu pao-siu gyi-go dao-li. ¹⁵ Ng li-hyang yia yiu pao-siu Ngô sô u-su? Nyi-ko-lah keh-tông dao-li go. ¹⁶ Ng kæ we-sing-cün-i, feh-jün Ngô soh-soh tao ng u-sen læ, yüong Ngô cü-pô-li-go pao-kyin teng gyi-lah tang-tsiang. ¹⁷ Yiu ng-to go kæ t’ing Sing-Ling kao-hyang cong kyiao-we go shih-wô. Teh-sing-go cü-kwu, Ngô we: s-peh gyi en-dzông-go mô-nô, yi s-peh gyi ih-kw’e bah-bah-go zah-deo, zah-deo zông-teng sia ts’oh-tsæn-sing-go ming-z, djü-leh tsih-ziu cü-kwu ts-nga m-nying sih-teh-go.’

¹² 「再好写信拨别迦摩教会个使差，话：『有锋利宝剑个主顾是介话，¹³ 我晓得尔所做、等尔所庖，就是撒但座位乌碎；并且我忠信个见证安提帕被弄煞来尔拉中央，撒但所庖个乌碎，箇时候尔仍旧捏定我个名头，也晓得弃掉相信我个心。¹⁴ 但是我有一两样要批评尔。前头巴兰教巴力使得以色列人捩跌，就是吃偶像个祭物，做奸淫事干，尔箇头也有保守其个道理。¹⁵ 尔里向也有保守我所恶忒尼哥拉箇党道理个。¹⁶ 尔该回心转意，弗然我速速到尔乌碎来，用我

嘴巴里个宝剑等其拉打仗。¹⁷ 有耳朵个该听圣灵告向众教会个说话。得胜个主顾，我会赐拨其暗藏个吗喙，又赐拨其一块白白个石头，石头上顶写簇斩新个名字，除了接受主顾之外唔人识得个。』

¹⁸ “Tsæ hao sia sing peh T’e-yüô-t’e-lah kyiao-we-go s-ts’a, wô; ‘Jing-ming-go Ng-ts, gyi ngæn-tsing ziang ho-kwông, gyi kyiah ziang ting-hao dong, z-ka wô; ¹⁹ Ngô hyiao-teh ng sô tso, ng-go æ-sih teng bæn-z, ng-go siang-sing teng: jing-næ, yi hyiao-teh ng kyih-sah sô tso hao-jü ky’i-deo. ²⁰ Dæn-z Ngô wa-yiu ih-liang-yiang iao p’i-bing ng, ing-we keh-go nyü-nying Yiæ-si-bih zi wô z sin-cü-nying, ng ‘eo gyi kao-diao yiu-’ôh Ngô-go nu-boh ky’i tso kæn-ying teng ky’üoh ngeo-ziang-go tsi-veh. ²¹ Ngô s-peh gyi z-’eo iao gyi we-sing-cün-i, ky’i-diao gyi kæn-ying; gyi dzing-gyiu feh we-sing-cün-i. ²² Ngô pih-ding s-teh gyi kw’eng tao min-zông; teng gyi dô-kô tso kæn-ying go, ziah feh we-sing-cün-i kæ-ko gyi-lah sô tso, pih-ding kô-ts’eo do-do ‘o-næn; ²³ ping-ts’ia pô gyi ng-ts keh-le tang-sah djü-mih. Long-tsong kyiao-we ziu we hyiao-teh dzô-ts’ah nying-go sing-dziang ziu-z Ngô; Ngô yi we tsiao kôh-nying sô tso-go, pao ng-lah. ²⁴ Ng-lah teng væn-pah læ T’e-yüô-t’e-lah feh i gyi kao-diao, feh sih-teh gyi-lah sô-wô Sah-dæn-go ao-miao; Ngô feh pô bih-go tæ-n-ts peh ng-lah t’iao: ²⁵ tsih-yiu ng sô yiu-go, hao pao-siu teng-tao Ngô læ. ²⁶ Teh-sing, siu Ngô-go ‘ao-ling tao-ti go cü-kwu, Ngô we s-peh gyi công-kwun væn-koh, ²⁷ yüong t’ih-kweng kwun-jih gyi-lah, yiu-ts-wu k’ao-se ngô-ho, tsing-ziang Ngô tsih-ziu Ngô-go Ah-tia ka. ²⁸ Ngô yi we s-peh gyi ng-kang-hyiao. ²⁹ Yiu ng-to go kæ t’ing Sing-Ling kao-hyang cong kyiao-we go shih-wô.’

¹⁸ 「再好写信拨推雅推喇教会个使差，话：『神明个儿子，其眼睛像火光，其脚像顶好铜，是介话：¹⁹ 我晓得尔所做、尔个爱惜等办事、尔个相信等忍耐，又晓得尔结煞所做好如起头。²⁰ 但是我还有一两样要批评尔，因为箇个女人耶洗别自话是先知人，尔候其教条诱惑我个奴仆去做奸淫等吃偶像个祭物。²¹ 我赐拨其时候要其回心转意，弃掉其奸淫；其仍旧弗回心转意。²² 我必定使得其困倒眠床；等其大家做奸淫个，若弗回心转意改过其拉所做，必定加凑大大祸难；²³ 并且把其儿子箇类打煞除灭。拢总教会就会晓得查察人个心肠就是我；我又会照各人所做个，报尔拉。²⁴ 尔拉等凡百来推雅推喇弗依其教条、弗识得其拉所话撒但个奥妙；我弗把别个担子拨尔拉挑。²⁵ 只有尔所有个，好保守等到我来。²⁶ 得胜，守我个号令到底个主顾，我会赐拨其掌管万国，²⁷ 用铁棍管拾其拉，犹之乎敲碎瓦货，正像我接受我个阿爹介。²⁸ 我又会赐拨其五更晓。²⁹ 有耳朵个该听圣灵告向众教会个说话。』

Mz. III.

“Tsæ hao sia sing peh Sah-dih kyiao-we-go s-ts’a, wô; “Yiu Jing-ming ts’ih-go Ling teng ts’ih-lih sing go Cü-kwu z-ka wô, Ngô hyiao-teh ng sô tso; ming-deo z weh-go, jih-we z si-go. ² Yüong kying-sing, kyin-kwu ng kw’a iao si dzing-lôh-tong-go hao-c’ü, ing-we Ngô k’en-kyin ng sô tso: læ Jing-ming min-zin feh djün-be-go. ³ Ka-ni ng kæ kyi-teh zin-deo dza-go tsih-ziu, dza-go t’ing-meng; ping-ts’ia kæ pao-siu-ts we-sing-cün-i Ziah feh kying-sing, Ngô tsiang-læ ziang zeh ka tao ng u-sen, ng yia feh hyiao-teh Ngô. kyi-z tao. ⁴ Ziu-z ng-lah Sah-dih di-fông yiu kyi ming feh zing long ao-tsao gyi-go i-zông; gyi-lah tsiang-læ c’ün-leh bah teng Ngô dô-kô tseo-tseo, ing-we gyi-lah yia ing-tông-go. ⁵ Teh-sing-go cü-kwu tsiang-læ we c’ün-leh bah i-zông; Ngô feh we du-siao gyi-go ming-z læ weh-ming ts’ah-ts-li, Ngô we tsiao-jing gyi-go ming-z læ Ngô Ah-tia teng Gyi t’in-s-go min-zin. ⁶ Yiu ng-to go kæ t’ing Sing-Ling kao hyiang cong kyiao-we go shih-wô.’

「再好写信拨撒狄教会个使差，话：『有神明七个灵等七粒星个主顾是介话，我晓得尔所做；名头是活个，实惠是死个。² 用警醒，坚固尔快要死剩落东个好处，因为我看见尔所做，来神明面前弗全备个。³ 介呢尔该记得前头咋个接受，咋个听闻；并且该保守仔回心转意。若弗警醒，我将来像贼介到尔乌碎，尔也弗晓得我几时到。⁴ 就是尔拉撒狄地方有几名弗曾弄麀糟其个衣裳；其拉将来穿勒白等我大家走走，因为其拉也应当个。⁵ 得胜个主顾将来会穿勒白衣裳；我弗会涂销其个名字来活命册子里，我会招认其个名字来我阿爹等其天使个面前。⁶ 有耳朵个该听圣灵告向众教会个说话。』

⁷ “Tsæ hao sia-sing peh Fi-lah-t’ih-fi kyiao-we-go s-ts’a, wô; ‘Sing-jün dzing-jih-go, do Da-bih-go yiah-z, k’æ-ts m-nying kwæn, kwæn-ts m-nying k’æ go Cü-kwu z-ka wô, ⁸ Ngô hyiao-teh ng sô tso: ts’ia-k’en Ngô pô meng læ ng-go min-zin k’æ-tong, m-nying neng-keo kwæn: ing-we ng sao-we yiu-tin lih-liang; yi siu-djü Ngô-go shih-wô, m̃-teh feh tsiao-jing Ngô-go ming-deo. ⁹ Keh-sing joh-ü Sah-dæn jü-we-dông go zi wô z Yiu-t’a nying, jih-we feh-z, z mao-c’ong-go; Ngô we s-teh gyi-lah læ p’oh-tao ng-go kyiah-’ô, hyiao-teh Ngô z æ-sih ng. ¹⁰ Ng kyi-kying næ-sing pao-siu Ngô dao-li, tsiang-læ keh-sing wæn-næn iao ling-djôh ‘en-t’in-’ô s-s shü-kæn-zông nying z-’eo, Ngô yia we pao-siu ng. ¹¹ Ts’ia-k’en Ngô soh-soh læ-gyi: ng sô yiu-go, yüong nyiah-leh-lao; k’ong-p’ô yiu nying pô ng-go bing-t’in-kwun deh-leh-ky’i. ¹² Teh-sing-go cü-kwu, Ngô we pô gyi læ Ngô Jing-ming-go din-li tso djü-ts, üong-yün feh we tseo-c’ih; ngô we pô Ngô Jing-ming-go ming-z teng Ngô Jing-ming-go dzing-ts, ziu-z dzong t’in-zông Ngô Jing-ming u-sen kông-lôh-læ-go

ts'oh-sing Yiä-lu-sah-leng-go ming-z, teng Ngô ts'oh-sing-go ming-z, tu sia læ gyi-go zông-deo.¹³ Yiu ng-to go kâ t'ing Sing-Ling kao-hyang cong kyiao-we go shih-wô.'

⁷ 「再好写信拨非拉铁非教会个使差，话：『圣善诚实个，驮大辟个钥匙，开仔听人关，关仔听人开个主顾是介话，⁸ 我晓得尔所做。且看我把门来尔个面前开东，听人能够关。因为尔稍为有点力量；又守住我个说话，听得弗招认我个名头。⁹ 箇星属于撒但聚会堂个自话是犹太人，实为弗是，是冒充个；我会使得其拉来扑倒尔个脚下，晓得我是爱惜尔。¹⁰ 尔既经耐心保守我道理，将来箇星患难要临着咸天下试试世间上人时候，我也会保守尔。¹¹ 且看我速速来其。尔所有个，用捏勒牢；恐怕有人把尔个平天冠夺了去。¹² 得胜个主顾，我会把其来我神明个殿里做柱子，永远弗会走出。我会把我神明个名字等我神明个城子，就是从天上我神明乌碎降落来个簇新耶路撒冷个名字，等我簇新个名字，都写来其个上头。¹³ 有耳朵个该听圣灵告向众教会个说话。』

¹⁴ “Tsæ hao sia sing peh Lao-ti-kyüô kyiao-we-go s-ts'a, wô; ‘Tso Üô-meng go, tso cong-sing dzing-jih te-tsing go, tso Jing-ming zao-hwô ky'i-deo-go Cü-kwu z-ka wô,¹⁵ Ngô hyiao-teh ng sô tso, ng yi feh lang yi feh nyih; Ngô dân-nyün ng 'ôh-tsia lang 'ôh-tsia nyih.¹⁶ Ng kyi-kying nyih-dong-dong, yi feh lang yi feh nyih, Ngô tsiang-læ we cü-pô-li ôh ng c'ih.¹⁷ Ing-we ng zi wô zi yiu-lao, yi-kying fu-tsôh-de, ih-ngæn m-neh ky'üih-siao; feh teh-cü zi z kw'eng-kw'u, k'o-lin, bing-gyüong, hah-ngæn, c'ih-sing-lu-t'i-go.¹⁸ Ngô ky'ün-ky'ün ng dzong Ngô u-sen ma ho tön-ko-liao-go kying-ts, hao fu-tsôh; wa-yiu shih-bah-go i-zông hao c'ün-zông, sæn-leh ng c'ih-sing-lu-t'i ming-tông-tông wông-k'ong; wa-yiu ngæn-yiah dzô ng-go ngæn-tsing, hao k'en-kyin.¹⁹ Væn-pah ngô sô æ-sih-go, ngô p'i-bing gyi, tsah-vah gyi; keh-lah ng yüong nyih-sing, yüong we-sing-cün-i.²⁰ Ts'ia-k'en Ngô lih-leh meng-k'eo-den, tao meng: ziah yiu t'ing-meng Ngô sing-ing k'æ meng go, Ngô ziu we tseo-tsing gyi u-sen, Ngô teng gyi, gyi teng Ngô, hao dô-kô ky'üoh-ky'üoh.²¹ Teh-sing-go cü-kwu, Ngô we s-peh gyi teng Ngô dô-kô zo læ Ngô-go zo-we, tsing-ziang Ngô teh-sing, teng Ngô Ah-tia dô-kô zo læ Gyi-go zo-we-li.²² Yiu ng-to go, kâ t'ing Sing-Ling kao-hyang cong kyiao-we go shih-wô.”

¹⁴ 「再好写信拨老底嘉教会个使差，话：『做亚们个，做忠信诚实对证个，做神明造化起头个主顾是介话，¹⁵ 我晓得尔所做，尔又弗冷又弗热。我但愿尔或者冷或者热。¹⁶ 尔既经热炯炯，又弗冷又弗热，我将来会嘴巴里恶尔出。¹⁷ 因为尔自话自有佬，已经富足了，一眼听得缺少；弗得知自是困苦、可怜、贫穷、瞎眼、出身露体个。¹⁸ 我劝尔从我乌碎买火锻过了个金子，好富足；还有雪白个衣裳好穿上，省勒尔出身露体明当当惶恐；还有眼药搽尔个眼睛，好

看见。¹⁹ 凡百我所爱惜个，我批评其，责罚其。箇拉尔用热心，用回心转意。²⁰ 且看我立勒门口头，捣门。若有听闻我声音开门个，我就会走进其乌碎，我等其，其等我，好大家吃吃。²¹ 得胜个主顾，我会赐拨其等我大家坐来我个座位，正像我得胜，等我阿爹大家坐来其个座位里。²² 有耳朵个，该听圣灵告向众教会个说话。』』

Mz. IV.

Keh-go yi-'eo ngô k'en-k'en, k'en-kyin t'in-li yiu meng k'æ-kæn; wa-yiu keh deo-tsao-ts t'ing-meng-go ziang 'ao-dong ka sing-hyang teng ngô ka wô, "Ng tseo-zông dông-deo, Ngô we pô yi-'eo sô pih-ding yiu-go z-ken ts-tin hyang ng dao." ² Ngô ziu be *Sing-Ling* ken-dong, k'en-kyin yiu zo-we pa læ t'in-li, zo-we zông-teng yiu zo-tih-go: ³ keh zo-tih-go Cü-kwu siang-mao ziang pih-nyüoh teng mô-nao ka; nyiao-cün zo-we yiu heo, k'en-kyin ziang fi-ts'e-nyüoh ka. ⁴ Zo-we dön-ky'ün wa-yiu nyiæn-s-go zo-we, læ zo-we-li ngô k'en-kyin yiu nyiæn-s-go tsiang-lao zo-tih, c'ün bah-bah-go i-zông, deo ta kying-ts-go bing-t'in-kwun. ⁵ Dzong zo-we-li yiu sin-din, teng le, teng yiu-ho sing-ing; yiu ts'ih-tsæn teng zo-we min-zin tin-tih, ziu-z Jing-ming ts'ih-go Ling: ⁶ zo-we min-zin wa-yiu po-li hæ ziang se-tsing ka. Zo-we cong-nyiang teng zo-we dön-ky'ün yiu s-go seng-veh, gyi zin-'eo *weng-sing* yiu ngæn-tsing. ⁷ Deo-ih-go seng-veh ziang s-ts, di-nyi-go seng-veh ziang siao-ngeo, di-sæn-go seng-veh min-k'ong ziang nying, di-s-go seng-veh ziang fi-go lao-ing. ⁸ Keh s-go seng-veh ko-tang-ko dön-ky'ün yiu loh-tsah yih-sao, li-hyang *weng-sing* yiu ngæn-tsing, nyih-yia feh hyih læ-tih wô, "Sing-jün, sing-jün, sing-jün, djün-neng-go Cü Jing-ming, zin-deo *læ-tong*, yin-dzæ *læ-tong*, 'eo-deo yia *læ-tong*." ⁹ Keh seng-veh kwe yüong-wô, tseng-djong, ken-zia peh zo læ zo-we-zông üong-yün weh-tong-go Cü-kwu, ¹⁰ keh z-'eo nyiæn-s-go tsiang-lao boh-tao zo læ zo-we-zông go min-zin, pa-pa üong-yün weh-tong-go, tsoh-lôh gyi-go bing-t'in-kwun læ zo-we min-zin, z-ka wô, ¹¹ "Cü, Ng tông-kæ ziu yüong-wô, tseng-djong, gyün-ping, ing-we væn-veh tu z Ng sô zao; z zao-c'ih-læ yiu-go, tu z Ng-go ts-i."

箇个以后我看看，看见天里有门开间；还有箇头遭子听闻个像号箇介声响等我介话，「尔走上荡头，我会把以后所必定有个事干指点向尔道。」² 我就被圣灵感动，看见有座位摆来天里，座位上顶有坐的个。³ 箇坐的个主顾相貌像碧玉等玛瑙介；绕转座位有鲳，看见像翡翠玉介。⁴ 座位团圈还有廿四个座位；来座位里我看见有廿四个长老坐的，穿白白个衣裳，头戴金子个平天冠。⁵ 从座位里

有闪电，等雷，等有伙声音；有七盏灯座位面前点的，就是神明七个灵。⁶ 座位面前还有玻璃海像水晶介。座位中央等座位团圈有四个生物，其前后浑身有眼睛。⁷ 头一个生物像狮子，第二个生物像小牛，第三个生物面孔像人，第四个生物像飞个老鹰。⁸ 箇四个生物个打个团圈有六只翼梢，里向浑身有眼睛，日夜弗歇来的话，「圣善，圣善，圣善，全能个主神明，前头来东，现在来东，后头也来东。」⁹ 箇生物归荣华、尊重、感谢拨坐来座位上永远活东个主顾，¹⁰ 箇时候廿四个长老伏倒坐来座位上个面前，拜拜永远活东个，摘落其个平天冠来座位面前，是介话，¹¹ 「主，尔当该受荣华、尊重、权柄，因为万物都是尔所造；是造出来有个，都是尔个旨意。」

Mz. V.

Ngô yi k'en-kyin zo læ zo-we-zông Cü-kwu-go jing-tsah siu yiu ih-kyün shü, li-nga tu yiu z, yüong ts'ih-k'o ing fong-tih. ² Yi k'en-kyin neng-ken-go t'in-s do-do sing-hyang eo, z-ka wô, "Jü k'o-yi t'æn-k'æ keh-kyün shü, ts'ah-k'æ gyi-go ing ni?" ³ Læ t'in-zông di-ô teng di-ti-ô-go m-yiu neng-keo t'æn-k'æ keh-kyün shü k'en-k'en. ⁴ Ngô ziu do-nyiang ngæn-li c'ih, ing-we m-yiu k'o-yi t'æn-k'æ keh-kyün shü k'en-k'en cü-kwu. ⁵ Yiu ih-go tsiang-lao teng ngô wô, "Hao-vong ngæn-li c'ih; ts'ia-k'en Yiu-da ts-p'a-go S-ts, Da-bih-go keng-cü, yi-kying teh-sing hao t'æn-k'æ keh ih-kyün shü ts'ah-k'æ gyi ts'ih-k'o ing." ⁶ Ngô ziu k'en-kyin læ zo-we teng tsiang-lao s-go seng-veh cong-nyiang, ih-tsah Siao-ying lih-tong, ziang be sah-ko-liao ka, yiu ts'ih-go kôh, ts'ih-tsah ngæn-tsing, ziu-z Jing-ming ts'ih-go Ling vong ts'a tao 'en-t'in-ô go. ⁷ Gyi tseo-long, do keh-kyün shü læ zo-we-zông zo-tih-go jing-tsah siu-li. ⁸ Kyi-kying do-leh keh-kyün shü, keh s-go seng-veh teng nyiæn-s-go tsiang-lao, tu boh-tao Siao-ying min-zin, ko-tang-ko do-leh gying teng kying-ts hyang-lu, yiu mun-mun hyang tsi-tih, ziu-z cong sing-du-go tao-kao. ⁹ Gyi-lah ko-ts'ông ts'oh-tsæn-sing-go tsæn-me-s, z-ka wô, "Ng ing-tông do keh-kyün shü, ts'ah-k'æ gyi-go ing; ing-we Ng-noh be sah-diao, pô Ng-go hyüih c'ü-joh ah-lah dzong kôh ts-p'a k'eo-ing pah-sing koh-veng, tu kwe-peh Jing-ming; ¹⁰ s-teh ah-lah tso wông tso tsi-s læ ah-lah Jing-ming min-zin; yia hao læ t'in-ô tso wông." ¹¹ Ngô yi k'en-k'en, t'ing-meng zo-we teng seng-veh tsiang-lao dön-ky'ün yiu-ho t'in-s-go sing-ing, gyi su-moh ts'in-ts'in væn-væn, ¹² do-do sing-hyang læ-tih wô, "Keh sah-ko-liao-go Siao-ying ing-tông tsih-ziu gyün-ping, fu-tsôh, ts'ong-ming, lih-dao, tseng-djong, yüong-wô, coh-tsæn go." ¹³ Ngô yi t'ing-meng t'in-zông di-ô teng

di-ti-'ô hæ-yiang-li væn-pah sô yiu-go, teng gyi li-hyang go væn-veh, tu læ-tih wô,
“Dæn-nyün coh-tsæn, tseng-djong, yüong-wô, neng-ken, üong-yün kwe-peh zo-
we-zông zo-tih-go Cü-kwu teng Siao-yiang.”¹⁴ Keh s-go seng-veh wô, “Üô-meng.”
Keh nyiæn-s-go tsiang-lao boh-tao pa-pa üong-yün weh-tong-go Cü-kwu.

我又看见坐来座位上主顾个顺只手有一卷书，里外都有字，用七颗印封的。² 又看见能干个天使大大声响讴，是介话，「谁可以摊开箇卷书，拆开其个印呢？」³ 来天上、地下、等地底下个，既有能够摊开箇卷书看看。⁴ 我就大样眼泪出，因为既有可以摊开箇卷书看看主顾。⁵ 有一个长老等我话，「好留眼泪出。且看犹大支派个狮子，大辟个根株，已经得胜好摊开箇一卷书，拆开其七颗印。」⁶ 我就看见来座位等长老、四个生物中央，一只小羊立东，像被杀过了介，有七个角、七只眼睛，就是神明七个灵奉差到咸天下个。⁷ 其走拢，驮箇卷书来座位上坐的个顺只手里。⁸ 既经驮勒箇卷书，箇四个生物等廿四个长老，都伏倒小羊面前，个打个驮勒琴等金子香炉，有满满香衖的，就是众圣徒个祷告。⁹ 其拉歌唱簇斩新个赞美诗，是介话，「尔应当驮箇卷书，拆开其个印。因为尔依被杀掉，把尔个血取赎阿拉从各支派、口音、百姓、国份，都归拨神明；¹⁰ 使得阿拉做王、做祭司来阿拉神明面前；也好来天下做王。」¹¹ 我又看看，听闻座位等生物、长老团圈有伙天使个声音，其数目千千、万万，¹² 大大声响来的话，「箇杀过了个小羊应当接受权柄、富足、聪明、力道、尊重、荣华、祝赞个。」¹³ 我又听闻天上、地下、等地底下、海洋里凡百所有个，等其里向个万物，都来的话，「但愿祝赞、尊重、荣华、能干，永远归拨座位上坐的个主顾等小羊。」¹⁴ 箇四个生物话，「亚们。」箇廿四个长老伏倒拜拜永远活东个主顾。

Mz. VI.

Ngô k'en-k'en, Siao-yiang k'æ di-ih-k'o ing, ziu t'ing-meng s-go seng-veh li-hyang yiu ih-go, sing-hyang ziang le ka, wô, “Læ k'en.”² Ngô ziu k'en, k'en-kyin ih-p'ih bah mô, gyi-tih-go cü-kwu do-leh kong; wa-yiu s-peh gyi bing-t'in-kwun; gyi tseo-c'ih-ky'i teh-sing, yi teh-sing.

我看看，小羊开第一颗印，就听闻四个生物里向有一个，声响像雷介，话，「来看。」² 我就看，看见一匹白马；骑的个主顾驮勒弓；还有赐拨其平天冠；其走出去得胜，又得胜。

³ K'æ di-nyi-k'o ing, ngô t'ing-meng di-nyi-go seng-veh wô, "Læ k'en." ⁴ Yi yiu ih-p'ih 'ong mô tseo-c'ih; s-peh gyi-tih cü-kwu neng-keo deh-ky'i t'in-ô 'o-bing, s-teh gyi-lah sah-læ-sah-ky'i; wa-yiu ih-pô do-do tao kao-fu gyi.

³ 开第二颗印，我听闻第二个生物话，「来看。」⁴ 又有一匹红马走出；赐拨骑的主顾能够夺去天下和平，使得其拉杀来杀去；还有一把大大刀交付其。

⁵ K'æ di-sæn-k'o ing, ngô t'ing-meng di-sæn-go seng-veh wô, "Læ k'en." Ngô ziu k'en, k'en-kyin ih-p'ih heh mô, gyi-tih-go cü-kwu siu-li do ih-kwun ts'ing. ⁶ Ngô t'ing-meng læ s-go seng-veh cong-nyiang yiu sing-ing, z-ka wô, "Ih-sing siao-mah ma ih-din nying-ts; sæn-sing do-mah ma ih-din nying-ts; yiu teng tsiu m-nao long-wæn."

⁵ 开第三颗印，我听闻第三个生物话，「来看。」我就看，看见一匹黑马；骑的个主顾手里驮一管秤。⁶ 我听闻来四个生物中央有声音，是介话，「一升小麦卖一铤银子；三升大麦卖一铤银子；油等酒旣得好弄环。」

⁷ K'æ di-s-k'o ing, ngô t'ing-meng di-s-go seng-veh wô, "Læ k'en." ⁸ Ngô ziu k'en, k'en-kyin ih-p'ih hwe-seh-go mô; gyi-tih-go cü-kwu ming-z kyiao-leh Si; wa-yiu Ing-s dô-kô keng-tih; yiu gyün-ping s-peh gyi, læ shü-kæn-zông s-kwu-teh-ih, hao yüong tao-k'eo, hwông-nyin, yüoh-bing, teng yia-siu, long-sah gyi-lah.

⁷ 开第四颗印，我听闻第四个生物话，「来看。」⁸ 我就看，看见一匹灰色个马；骑的个主顾名字叫勒死；还有阴司大家跟的；有权柄赐拨其，来世间上四股得一，好用刀口、荒年、疫病、等野兽，弄煞其拉。

⁹ K'æ di-ng-k'o ing, ngô k'en-kyin læ tsi-dæn-ô yiu we-leh Jing-ming-go dao-li teng gyi-lah sô nyiah-ding-go te-tsing be sah-diao cü-kwu ling-weng: ¹⁰ gyi-lah do-do sing-hyang eo, z-ka wô, "Sing-jün dzing-jih-go Cü-tsæ, Ng feh sing-p'un t'in-ô deng-tih-go nying, feh p'iao-bah nying liu-c'ih ah-lah hyüih go ün-wông," tao kyi-z ni?" ¹¹ Ziu yiu shih-bah-go i-zông s-peh gyi-lah kôh-nying, yi kao-hyang gyi-lah ts'ia dzæn-z en-sing teng-tao dong-z-go hyüong-di tsiang-læ be sah-diao ziang gyi-lah ka su-moh mun-tsôh.

⁹ 开第五颗印，我看见来祭坛下有了神明个道理等其拉所捏定个对证被杀掉主顾灵魂。¹⁰ 其拉大大声响诬，是介话，「圣善诚实个主宰，尔弗审判天下庵的个人，弗漂白人流出阿拉血个冤枉，到几时呢？」¹¹ 就有雪白个衣裳赐拨其拉各人，又告向其拉且暂时安心等到同事个兄弟将来被杀掉像其拉介数目满足。

¹² K'æ di-loh-k'o ing, ngô ziu k'en-kyin di-yiang do-nyiang cing-dong, nyih-deo pin-leh heh-heh-go ziang mao-pu ka, yüih-liang pin-leh ziang hyüih ka; ¹³ t'in-li-go sing tih-lôh di-yiang-li, ziang vu-hwô-ko jü be do-fong c'ü-dong, gwæn-lôh gyi feh-zing joh-go ko-ts ka. ¹⁴ T'in ko-ky'i, ziang veng-shü kyün-long ka; væn-pah sæn-ling teng hæ-tao tu yi-ko gyi-go lao di-fông. ¹⁵ Ping-ts'ia shü-kæn-zông keh-sing kyüing-wông, kwun-fu, yiu-lao, wa-yiu tsiang-kyüing, yiu gyün-ping go, teng væn-pah tso nu-boh feh tso nu-boh go, tu zi iu læ sæn-dong teng sæn-ngæn-li, ¹⁶ ziu dziao-leh sæn teng zah-ngæn wô, "Hao tih-tao kæ-djü ah-lah, bi-ko zo-we-zông zo-tih-go Cü-kwu min-k'ong teng Siao-yiang-go ô-wông; ¹⁷ ing-we Gyi ô-wông-go do-do nyih-ts yi-kying tao-de; jü neng-keo tông-leh-djü ni?"

¹² 开第六颗印，我就看见地垵大样震动，日头变勒黑黑个像毛布介，月亮变勒像血介；¹³ 天里个星跌落地垵里，像无果树被大风吹动，攢落其弗曾熟个果子介。¹⁴ 天过去，像文书卷拢介；凡百山岭等海岛都移过其个老地方。¹⁵ 并且世间上箇星君王、官府、有佬，还有将军、有权柄个，等凡百做奴仆弗做奴仆个，都自幽来山洞等山岩里，¹⁶ 就朝勒山等石岩话，「好跌倒盖住阿拉，避过座位上坐的个主顾面孔等小羊个慍惶；¹⁷ 因为其慍惶个大大日子已经到了；谁能够挡勒住呢？」

Mz. VII.

Keh-go yi-'eo ngô k'en-kyin s-go t'in-s lih læ di-go s kôh-lôh-den," nyiah-leh s-fông-go fong," s-teh fong feh c'ü-djôh di teng hæ teng væn-pah jü-moh. ² Ngô yi k'en-kyin ih-go t'in-s dzong tong-pin zông-læ, do-leh weh Jing-ming-go ing, do-do sing-hyang eo keh-sing vong ts hao sông-'æ di teng hæ s-go t'in-s, z-ka wô, ³ "M-nao sông-'æ di-yiang teng hæ teng jü-moh, teng-tao ah-lah tang ih-ko ing læ ah-lah Jing-ming-go nu-boh nao-k'ôh-deo." ⁴ Ngô t'ing-meng keh-sing ziu ing go su-moh, læ Yi-seh-lih pah-sing-go cong ts-p'a yiu ih-pah s-jih-s ts'in tang-ing-ko-de. ⁵ Yiu-da ts-p'a ziu ing go, jih-nyi ts'in. Liu-bin ts-p'a ziu ing go, jih-nyi ts'in. Kyüô-teh ts-p'a ziu ing go, jih-nyi ts'in. ⁶ Üô-shih ts-p'a ziu ing go, jih-nyi ts'in. Neh-da-li ts-p'a ziu ing go, jih-nyi ts'in. Mô-nô-si ts-p'a ziu ing go, jih-nyi ts'in. ⁷ Si-min ts-p'a ziu ing go, jih-nyi ts'in. Li-vi ts-p'a ziu ing go, jih-nyi ts'in. Yi-sah-kyüô ts-p'a ziu ing go, jih-nyi ts'in. ⁸ Si-pu-leng ts-p'a ziu ing go, jih-nyi ts'in. Iah-seh ts-p'a ziu ing go, jih-nyi ts'in. Bin-yüô-ming ts-p'a ziu ing go, jih-nyi ts'in.

箇个以后我看见四个天使立来地个四角落头，捏勒四方个风，使得风弗吹着地、等海、等凡百树木。² 我又看见一个天使从东边上来，驮勒活神明个印，大大声响讴箇星奉旨好伤害地等海四个天使，是介话，³ 「旡得好伤害地垵等海等树木，等到阿拉打一个印来阿拉神明个奴仆脑壳头。」⁴ 我听闻箇星受印个数目，来以色列百姓个众支派有一百四十四千打印过了。⁵ 犹太支派受印个，十二千。流便支派受印个，十二千。迦得支派受印个，十二千。⁶ 亚设支派受印个，十二千。纳大利支派受印个，十二千。玛拿西支派受印个，十二千。⁷ 西面支派受印个，十二千。利未支派受印个，十二千。以萨迦支派受印个，十二千。⁸ 西布伦支派受印个，十二千。约瑟支派受印个，十二千。便雅悯支派受印个，十二千。

⁹ Keh-go yi-'eo ngô k'en-kyin dzong long-tsong koh-kô, dzoh-veng, pah-sing, k'eo-ing, yiu ih-do-dziao nying, su tu su-feh-pin-go, lih læ zo-we teng Siao-ying go min-zin, c'ün-leh shih-bah-go i-zông, siu nyiah-leh tsao-jü-go ô-ts; ¹⁰ do-do sing-hyang eo, z-ka wô, "Dæn-nyün kyi-sing kwe peh zo læ zo-we-li ah-lah-go Jing-ming, teng Siao-ying." ¹¹ Long-tsong t'in-s yü-cün zo-we, teng tsiang-lao, teng s-go seng-veh, læ zo-we min-zin boh-tao pa-pa Jing-ming, z-ka wô, ¹² "Üô-meng: dæn-nyün coh-tsæn, yüong-wô, ts'ong-ming, ken-zia, tseng-kwe, gyün-ping, neng-ken, üong-yün kwe peh ah-lah-go Jing-ming: Üô-meng." ¹³ Yiu ih-go tsiang-lao teng ngô wô, "Keh-sing c'ün shih-bah i-zông go z jü? dzong 'ah-li ka læ-go?" ¹⁴ Ngô wô, "Ng tseng-kô z hyiao-teh-go." Gyi wô, "Keh-sing z dzong do-do næn-deo ka c'ih-læ, yüong Siao-ying-go hyüih gyiang-leh gyi-go i-zông shih-bah-go de. ¹⁵ Sô-yi læ Jing-ming-go zo-we min-zin, nyih-nyih-yia-yia læ Gyi-go Sing-din-li voh-z Gyi; ping-ts'ia zo læ zo-we-zông Cü-kwu deng læ gyi-lah cong-nyiang. ¹⁶ Gyi-lah feh we tsæ du-kyi, feh we tsæ k'eo-k'eh; nyih-deo teng long-tsong ho-ky'i feh we tsao-djôh. ¹⁷ Zo-we cong-nyiang go Siao-ying we tsiao-kwun gyi-lah, ling tao weh-shü-go nyün-deo; ping-ts'ia Jing-ming we k'a-diao gyi-lah ngæn-tsing-li ih-ts'ih-go ngæn-li.

⁹ 箇个以后我看见从拢总国家、族份、百姓、口音，有一大潮人，数都数弗遍个，立来座位等小羊个面前，穿勒雪白个衣裳，手捏勒枣树个桠枝。¹⁰ 大大声响讴，是介话，「但愿救星归拨坐来座位里阿拉个神明，等小羊。」¹¹ 拢总天使围转座位等长老等四个生物，来座位面前伏倒拜拜神明，是介话，¹² 「亚们。但愿祝赞、荣华、聪明、感谢、尊贵、权柄、能干，永远归拨阿拉个神明。亚们。」¹³ 有一个长老等我话，「箇星穿雪白衣裳个是谁？从何里介来个？」¹⁴ 我话，「尔尊驾是晓得个。」其话，「箇星是从大大难头介出来，用小羊个血澆勒其个衣裳

雪白个了。¹⁵ 所以来神明个座位面前，日日夜夜来其个圣殿里服侍其；并且坐来座位上主顾庵来其拉中央。¹⁶ 其拉弗会再肚饥，弗会再口渴；日头等拢总火气弗会遭着。¹⁷ 座位中央个小羊会照管其拉，领到活水个源头；并且神明会揩掉其拉眼睛里一切个眼泪。」

Mz. VIII.

K'æ di-ts'ih-k'o ing, t'in ziu zing-zing-go da-iah pun-tin-cong kong-fu. ² Ngô k'en-kyin keh lih læ Jing-ming min-zin ts'ih-go t'in-s, yiu ts'ih-go 'ao-dong kao-dæ gyi-lah. ³ Yi yiu ih-go t'in-s læ, do-leh kying-ts hyiang-lu, lih læ tsi-dæn bông-pin, yiu hyü-to hyiang s-peh gyi, hao teng cong sing-du-go tao-kao dô-kô hyin-zông zo-we min-zin kying-ts tsi-dæn zông-teng. ⁴ Hyiang-go in teng cong sing-du-go tao-kao, dzong t'in-s-go siu-li, dô-kô sing-zông Jing-ming-go min-zin. ⁵ T'in-s do-leh hyiang-lu, pô dæn-zông-go ho tsi-mun-ts, tao læ di-jiang; ziu yiu hyü-to nying-sing, teng hyiang-le, sin-din, di-cing.

开第七颗印，天就靜靜个大约半点钟工夫。² 我看见箇立来神明面前七个天使，有七个号筒交代其拉。³ 又有一个天使来，驮勒金子香炉，立来祭坛旁边，有许多香赐拨其，好等众圣徒个祷告大家献上座位面前金子祭坛上顶。⁴ 香个烟等众圣徒个祷告，从天使个手里，大家升上神明个面前。⁵ 天使驮勒香炉，把坛上个火齒滿仔，倒来地垵；就有许多人声、等响雷、闪电、地震。

⁶ Do ts'ih-go 'ao-dong keh ts'ih-go t'in-s ziu zi be-bæn c'ü. ⁷ Di-ih-go t'in-s c'ü 'ao-dong, ziu yiu boh-ts teng ho 'o-leh hyüih, kông-lôh læ di-jiang: jü-moh me-diao sæn-kwu-teh-ih, yi me-diao long-tsong ts'ing-ts'ao.

⁶ 驮七个号筒箇七个天使就自备办吹。⁷ 第一个天使吹号筒，就有雹子等火和勒血，降落来地垵。树木焜掉三股得一，又焜掉拢总青草。

⁸ Di-nyi-go t'in-s c'ü 'ao-dong, ziu yiu ziang do-do sæn, ho læ-tih me ka, tiuleh hæ-li: keh-tsao hæ-shü sæn-kwu-teh-ih pin tso hyüih. ⁹ Wa-yiu hæ-li weh-go tong-si si-diao sæn-kwu-ts-ih; jün yia wæ-diao sæn-kwu-ts-ih.

⁸ 第二个天使吹号筒，就有像大大山，火来的焜介，丢勒海里。箇遭海水三股得一变做血。⁹ 还有海里活个东西死掉三股之一；船也坏掉三股之一。

¹⁰ Di-sæn-go t'in-s c'ü 'ao-dong; ziu yiu ih-lih do-do sing dzong t'in tih-lôh, yin-deo ziang ho-pô ka, tih-lôh læ kông-'o sæn-kwu-ts-ih, teng keh-sing shü-nyün-

li. ¹¹ Keh-lih sing ming-z kyiao-leh Ing-dzing; shü sän-kwu-ts-ih pin tso ing-dzing; we-leh shü pin kw'u, hyü-to nying si-de.

¹⁰ 第三个天使吹号筒。就有一粒大大星从天跌落，焰头像火把介，跌落来江河三股之一，等箇星水源里。¹¹ 箇粒星名字叫勒茵陈。水三股之一变做茵陈。为了水变苦，许多人死了。

¹² Di-s-go t'in-s c'ü 'ao-dong; nyih-deo, yüih-liang, sing-siu tu yiu sän-kwu-ts-ih tang-diao, s-teh gyi sän-kwu-ts-ih heh-en; nyih-li sän-kwu-ts-ih m-neh liang-kwông; yia-tao yia z-ka.

¹² 第四个天使吹号筒。日头、月亮、星宿都有三股之一打掉，使得其三股之一黑暗。日里三股之一吮得亮光；夜到也是介。

¹³ Ngô yi k'en-k'en t'ing-meng ih-go t'in-s fi-zông pun-t'in-li, do-do sing-hyang z-ka wô, “‘O-se, ‘o-se, ‘o-se, ling-djôh di-zông deng-go cü-kwu, we-leh yü-to sän-go t'in-s kw'a iao c'ü 'ao-dong go sing-hyang!”

¹³ 我又看看听闻一个天使飞上半天里，大大声响是介话，「祸祟，祸祟，祸祟，临着地上庵个主顾，为了余多三个天使快要吹号筒个声响！」

Mz. IX.

Di-ng-go t'in-s c'ü 'ao-dong; ngô k'en-kyin ih-lih sing dzong t'in-zông tih-lôh di-jiang-li: ping-ts'ia yiu m-ti-k'ang yiah-z kao-fu gyi. ² Gyi ziu k'æ-k'æ m-ti-k'ang; yiu in, ziang mang-mang ho-lu-go in ka, dzong k'ang-li zông-læ. Nyih-deo teng ky'üong-ts'ông we-leh k'ang-li-go in heh-en-de. ³ Yiu wông-djong dzong in-li tseo-c'ih tao di-jiang-li; ping-ts'ia yiu gyün-ping s-peh gyi, ziang di-zông hyih-ts ka yiu gyün-ping. ⁴ Gyi-lah vong ts feh sông-'æ di-zông-go ts'ao, teng pih-loh-go yih, teng pah-jiang jü-moh; tæh-tsih sông-'æ ngah-kôh-li m-teh Jing-ming ing tang-tih go nying. ⁵ Sô s-peh gyi go gyün-ping, feh-z hao sah nying, z iao kw'eng-kw'u gyi ngo yüih. Gyi kw'u tsing-ziang hyih-ts ting nying ka kw'u. ⁶ Keh ^[1]z-'eo nying iao zing si, zing-feh-læ; pô-feh-neng-keo si, si we bi-k'æ gyi. ⁷ Keh-sing wông-djong z ziang be-bæn kao-tsin go mô; gyi deo-zông ziang ta kying-ts-go kwun-min; gyi min-k'ong ziang nying-go min-k'ong; ⁸ deo-fah ziang nyü-nying-go deo-fah; ngô-ts' ziang s-ts-go ngô-ts'. ⁹ Gyi-lah wu-sing-kying ziang t'ih-kah ka; gyi yih-sao-go sing-hyang ziang hyü-to ts'ô-ts teng mô kw'a-kw'a peng ky'i kao-tsin go sing-

hyiang.¹⁰ Gyi mi-pô ziang hyih-ts ka; mi-pô-li yiu ts': gyi-go gyün-ping z hao sông-
'æ nying ng-ko yüih.¹¹ Gyi-lah yiu ih-go wông-ti, ziu-z m-ti-k'ang-go s-ts'a; tsiao
Hyi-pah-læ k'eo-ing kyiao-leh^[2]Üô-pô-teng, tsiao Hyi-li-nyi k'eo-ing kyiao-leh
[2]Üô-po-leng.

第五个天使吹号筒。我看见一粒星从地上跌落地垠里。并且有底坑钥匙
交付其。² 其就开开底坑。有烟，像猛猛火炉个烟介，从坑里上来。日头等穹
苍为了坑里个烟黑暗了。³ 有蝗虫从烟里走出到地垠里。并且有权柄赐拨其，像
地上蝎子介有权柄。⁴ 其拉奉旨弗伤害地上个草，等碧绿个叶，等百样树木；单
只伤害额角里旣得神明印打的个人。⁵ 所赐拨其个权柄，弗是好杀人，是要困苦
其五个月。其苦正像蝎子叮人介苦。⁶ 箇时候^[1]人要寻死，寻弗来；巴弗能够
死，死会避开其。⁷ 箇星蝗虫是像备办交战个马。其头上像戴金子个冠冕。其面
孔像人个面孔。⁸ 头发像女人个头发。牙齿像狮子个牙齿。⁹ 其拉护心镜像铁甲
介。其翼梢个声响像许多车子等马快快奔去交战个声响。¹⁰ 其尾巴像蝎子介。
尾巴里有刺。其个权柄是好伤害人五个月。¹¹ 其拉有一个皇帝，就是底坑个
使差；照希伯来口音叫勒亚巴顿^[2]，照希利尼口音叫勒亚玻伦^[2]。

[1] 此处原书错印为 z'eo

[2] ziu-z we mih-vông go i-s. 就是会灭亡个意思。（原注）

¹² Ih-go 'o-se ko-de; wa-yiu liang-go 'o-se læ-gyi.

¹² 一个祸祟过了。还有两个祸祟来其。

¹³ Di-loh-go t'in-s c'ü 'ao-dong; ngô t'ing-meng yiu sing-ing dzong Jing-ming
min-zin, kying-dæn-go s-kôh ka læ,¹⁴ teng nyiah 'ao-dong keh di-loh-go t'in-s z-ka
wô, "Bo læ Pah-lah do 'o keh s-go t'in-s, hao fông gyi."¹⁵ Keh-sing t'in-s be fông-
c'ih, yi-kying be-bæn sah nying sæn-kwu-ts-ih, ziu-z læ ding-hao-go z-zing, nyih-
ts, yüih-veng, nyin-kang.¹⁶ Mô-ping-go su-moh yiu nyi-væn-væn; ngô z t'ing-meng
gyi su-moh.¹⁷ Ngô vong meh-z k'en-kyin mô teng gyi-tih-go cü-kwu z-ka. Gyi wu-
sing-kying ziang ho-kwông, ziang ts-'ong seh, ziang liu-wông ka. Mô deo ziang s-ts
deo; yiu ho, teng in, teng liu-wông dzong gyi k'eo-li p'eng-c'ih.¹⁸ Yüong keh sæn-
yang, ziu-z gyi k'eo-li sô p'eng-c'ih-go ho, teng in, teng liu-wông, sah nying sæn-
kwu-ts-ih.¹⁹ Mô-go shü-dao dzæ-ü gyi cü-pô teng mi-pô. Gyi mi-pô ziang dzô, yia
yiu deo; z yüong-leh gyi we sông-'æ.²⁰ Yü-to-go nying, feh-zing tsao-djôh keh-sing
tsæ-næn si go, wa feh hwe-kæ gyi siu-li sô tso-go; ziu-z pa kyü, teng kying, nying,
dong, moh-deo, zah-deo, keh-sing ve k'en-kyin, ve t'ing-meng, ve 'ang-dong go
ngeo-ziang;²¹ yia feh hwe-kæ gyi-lah hyüong-siu, zia-jih, kæn-ying, t'eo-dao keh-
sing.

¹³ 第六个天使吹号筒。我听闻有声音从神明面前，金坛个四角介来，¹⁴ 等捏号筒箇第六个天使是介话，「缚来伯拉大河箇四个天使，好放其。」¹⁵ 箇星天使被放出，已经备办杀人三股之一，就是来定好个时辰、日子、月份、年庚。¹⁶ 马兵个数目有二万万。我是听闻其数目。¹⁷ 我逢默示看见马等骑的个主顾是介。其护心镜像火光、像紫红色、像硫磺介。马头像狮子头。有火、等烟、等硫磺从其口里喷出。¹⁸ 用箇三样，就是其口里所喷出个火、等烟、等硫磺，杀人三股之一。¹⁹ 马个势道在于其嘴巴等尾巴。其尾巴像蛇，也有头；是用勒其会伤害。²⁰ 余多个人，弗曾遭着箇星灾难死个，还弗悔改其手里所做个；就是拜鬼、等金、银、铜、木头、石头，箇星膾看见、膾听闻、膾行动个偶像。²¹ 也弗悔改其拉凶手、邪术、奸淫、偷盗箇星。

Mz. X.

Ngô yi k'en-kyin do neng-ken-go t'in-s dzong t'in kông-lôh-læ, c'ün-leh yüing, yiu heo læ gyi deo-zông; gyi min-k'ong ziang nyih-deo ka; gyi kyiah ziang ho-djü ka; ² siu-li do ih-kyün siao-siao shü t'æn-k'æ-tih. Gyi jing-tsah kyiah dah læ hæ-zông, tsia-tsah kyiah dah læ di-zông; ³ do-do sing-hyang eo-c'ih-læ, ziang s-ts hyiao ka. Eo-hao-ts yiu ts'ih-go le fah-c'ih sing-hyang. ⁴ Keh ts'ih-go le kông-hao-ts, ngô tang-tsiang sia-lôh, tsih t'ing-meng dzong t'in-zông yiu sing-ing, z-ka wô, "Keh ts'ih-go le sô kông-go, yüong fong-hao, feh k'o sia-c'ih."

我又看见大能干个天使从天降落来，穿勒云，有蜚来其头上；其面孔像日头介；其脚像火柱介；² 手里驮一卷小小书摊开的。其顺只脚踏来海上，借只脚踏来地上；³ 大大声响讴出来，像狮子哮介。讴好仔有七个雷发出声响。⁴ 箇七个雷讲好仔，我打账写落，只听闻从天上有声音，是介话，「箇七个雷所讲个，用封好，弗可写出。」

⁵ Ngô sô k'en-kyin lih læ hæ teng di-zông go t'in-s ziu di siu hyiang t'in, ⁶ ts-tin üong-weh-go Cü, ziu-z zao t'in lin gyi li-hyang sô yiu-go, di lin gyi li-hyang sô yiu-go, hæ lin gyi li-hyang sô yiu-go Cü-kwu, vah-tsiu wô, "Z-'eo ^[2]wa feh-zing tao; ⁷ iao teng di-ts'ih-go t'in-s ky'i c'ü 'ao-dong ^[1]z-'eo, Jing-ming ao-miao z-ken ziu we tso dzing-kong, tsiao Gyi hao-hao sing-sih, yi-kying djün peh Gyi nu-boh, keh-sing sin-cü-nying go.

⁵ 我所看见立来海等地上个天使就提手向天，⁶ 指点永活个主，就是造天连其里向所有个、地连其里向所有个、海连其里向所有个主顾，罚咒话，「时候还

弗曾到^[2]；⁷ 要等第七个天使去吹号筒时候，神明奥妙事干就会做成功，照其好好信息，已经传拨其奴仆，箇星先知人个。」

[1] 此处原书错印为 z'eo

[2] 'òh-wô; keh-tsao m-teh-de. 或话；箇遭旤得了。（原注）

⁸ Ngô sô t'ing-meng keh dzong t'in læ-go sing-hyang yi teng ngô wô, “Ng hao tseo-long keh-we lih læ hæ teng di-zông go t'in-s, tsih-ziu gyi siu-li t'æn-k'æ-kæn-go siao-kyün.” ⁹ Ngô ziu tseo-long t'in-s u-sen, teng gyi wô, “Ts'ing ng pô keh siao-kyün s-peh ngô.” Gyi teng ngô wô, “Ng hao do-ky'i ky'üoh, z we s-teh ng du-bi-li kw'u, dæn-z ng k'eo-li we ziang mih-dông ka din.” ¹⁰ Ngô ziu dzong t'in-s-go siu-li tsih-ziu keh siao-kyün ky'üoh-de; læ k'eo-li ko-jün ziang mih-dông ka din; ky'üoh ts-'eo ngô du-bi z kw'u-go. ¹¹ Gyi teng ngô wô, “Ng pih-iao kông sin-cü shih-wô læ hyü-to pah-sing, koh-veng, k'eo-ing, teng kyüing-wông-go min-zin.”

⁸ 我所听闻箇从天来个声响又等我话，「尔好走拢箇位立来海等地上个天使，接受其手里摊开间个小卷。」⁹ 我就走拢天使乌碎，等其话，「请尔把箇小卷赐拨我。」其等我话，「尔好驮去吃，是会使得尔肚皮里苦，但是尔口里会像蜜糖介甜。」¹⁰ 我就从天使个手里接受箇小卷吃了；来口里果然像蜜糖介甜；吃之后我肚皮是苦个。¹¹ 其等我话，「尔必要讲先知说话来许多百姓、国份、口音、等君王个面前。」

Mz. XI.

Ziu yiu ih-keng ziang kweng-ts ka dziang-ts'ih kao-fu ngô. Gyi wô, “Bô-ky'i, liang Jing-ming-go sing-din teng tsi-dæn, lin li-hyang tso li-pa cü-kwu. ² Tæn-tsih djü-c'ih sing-din-nga-go yü-ziang, hao-vong liang; ing-we keh z yi-kying s-peh bih-koh-nying: gyi-lah we nao-wu sing-dzing s-jih-nyi-ko yüih. ³ Ngô we s gyün-ping peh ngô liang-go kyin-tsing, c'ün-leh mô-i, kông sin-cü shih-wô ih-ts'in nyi-pah loh-jih nyih.”

就有一根像棍子介丈尺交付我。其话，「爬起，量神明个圣殿等祭坛，连里向做礼拜主顾。² 单只除出圣殿外个围墙，好留量。因为箇是已经赐拨别国人。其拉会蹕糊圣城四十二个月。³ 我会赐权柄拨我两个见证，穿勒麻衣，讲先知说话一千二百六十日。」

⁴ Keh ziu-z liang-cü ken-læn jü, teng liang-kwun teng-dæ, dzing lih læ di-zông Cü-go min-zin. ⁵ Ziah yiu nying iao 'æ gyi, yiu ho dzong gyi-lah k'eo-li p'eng-c'ih, mih-diao gyi-go dziu-dih. Ziah yiu nying iao 'æ gyi, pih-ding z-ka be sah diao. ⁶ Gyi-lah yiu gyün-ping hao seh-djü t'in, s-teh gyi tông sin-cü-nying go nyih-ts feh lôh-yü; yia yiu gyün-ping hao s-teh keh-sing shü we pin tso hyüih; ping-ts'ia ze gyi sô iao-go z-'eo hao yüong hyü-to tsæ-næn tang-djôh di-ying.

⁴ 箇就是两株橄榄树，等两管灯台，长立来地上主个面前。⁵ 若有人要害其，有火从其拉口里喷出，灭掉其个仇敌。若有人要害其，必定是介被杀掉。⁶ 其拉有权柄好塞住天，使得其当先知人个日子弗落雨；也有权柄好使得箇星水会变做血；并且随其所要个时候好用许多灾难打着地垵。

⁷ Gyi-lah te-tsing tso-mun, dzong m-ti-k'ang tseo-zông-go yia-siu we teng gyi-lah tang-tsiang, tang-ying sah-diao gyi; ⁸ fông gyi-lah s-siu læ do dzing-ts-go lu-kali, ziu-z pi-fông kyiao-leh Sô-to-mô teng Yiæ-gyih, ah-lah "Cü be ting læ jih-z-kô go u-sen. ⁹ Keh-sing pah-sing, dzoh-veng, k'eo-ing, koh-kô, yiu-teh-go we k'en-kyin gyi-lah s-siu sæn nyih pun, feh hyü en-tsông gyi s-siu læ veng-mo-li. ¹⁰ Deng læ di-zông go nying ziu we-leh gyi hwun-hyi kw'a-lôh, pô li-veh song-læ-song-ky'i; ing-we keh liang-go sin-cü-nying z mo-næn keh-sing deng læ di go cü-kwu.

⁷ 其拉对证做满，从旣底坑走上个野兽会等其拉打仗，打赢杀掉其。⁸ 放其拉尸首来大城子个路街里，就是比方叫勒所多玛等埃及，阿拉主被钉来十字架个乌碎。⁹ 箇星百姓、族份、口音、国家，有得个会看见其拉尸首三日半，弗许安葬其尸首来坟墓里。¹⁰ 庵来地上个人就为了其欢喜快乐，把礼物送来送去。因为箇两个先知人是磨难箇星庵来地个主顾。

¹¹ Ko-leh sæn nyih pun, yiu weh-go ling dzong Jing-ming tseo-tsing gyi-lah, kyiah ziu lih-ky'i; keh-sing k'en-kyin-go cü-kwu tu do-nyiang ky'ih-hoh. ¹² Gyi-lah t'ing-meng dzong t'in-zông yiu do-do sing-hyang teng gyi-lah wô, "Ng hao zông-læ;" Gyi-lah ziu dzing-leh yüing sing-zông t'in; gyi-go dziu-dih yia tu k'en-kyin. ¹³ Keh-go z-'eo di-ying do-nyiang cing-dong, dzing-ts tao-diao jih-kwu-ts-ih: be di-cing ts'ih-ts'in yiu-ming-go nying ^[1]si-de; yü-to tu kying-hyæ, kwe yüong-wô peh t'in-zông-go Jing-ming.

¹¹ 过了三日半，有活个灵从神明走进其拉，脚就立起。箇星看见个主顾都大样吃惟。¹² 其拉听闻从天上有大大声响等其拉话，「尔好上来。」其拉就乘勒云升上天。其个仇敌也都看见。¹³ 箇个时候地垵大样震动，城子倒掉十股之一。被地震七千有名个人死了^[1]。余多都惊骇，归荣华拨天上个神明。

[1] 'ôh-wô, nying-go ming-z. 或话，人个名字。（原注）

¹⁴ Di-nyi 'o-se ko-de; di-sæn 'o-se we kw'a-kw'a læ.

¹⁴ 第二祸祟过了。第三祸祟会快快来。

¹⁵ Di-ts'ih-go t'in-s c'ü 'ao-dong; t'in-zông ziu yiu do-do sing-ing, wô, "Shü-kæn-zông-go koh-veng yi-kying kwe peh ah-lah Cü teng Gyi-go Kyi-toh: Gyi we tso Wông-ti tao shü-shü dæ-dæ." ¹⁶ Jing-ming min-zin zo læ zo-we-li keh nyiæn-s-go tsiang-lao ziu boh-tao di-yiang pa-pa Jing-ming, wô, ¹⁷ "Djün-neng Jing-ming, yin-dzæ læ-tong, zin-deo læ-tong, 'eo-deo yia læ-tong-go Cü, ken-zia Ng, ing-we Ng yi-kying tsih-công Ng do gyün-ping, tso wông-ti. ¹⁸ Bih-koh fah-nu; Ng ô-wông nyih-ts tao-de, hao sing-p'un si-nying, yia hao sông-s Ng-go nu-boh, Ziu-z keh-sing sin-cü-nying teng sing-du, lin væn-pah feh-leng do-siao kying-djong p'ô-gyü Ng ming-deo go cü-kwu; ping-ts'ia hao djü-mih keh-sing wæ-diao di-yiang go cü-kwu." ¹⁹ Ziu yiu Jing-ming-go sing-din k'æ-k'æ læ t'in-zông; yia hyin-c'ih Gyi iah-siang læ din-li: yi yiu sin-din, hyü-to sing-ing, hyiang-le, di-cing, teng do-do boh-ts.

¹⁵ 第七个天使吹号筒。天上就有大大声音，话，「世间上个国份已经归拨阿拉主等其个基督。其会做皇帝到世世代代。」¹⁶ 神明面前坐来座位里箇廿四个长老就伏倒地拜拜神明，话，¹⁷ 「全能神明，现在来东、前头来东、后头也来东个主，感谢尔，因为尔已经执掌尔大权柄，做皇帝。¹⁸ 别国发怒。尔慍惶日子到了，好审判死人，也好赏赐尔个奴仆，就是箇星先知人等圣徒，连凡百弗论大小敬重怕惧尔名头个主顾；并且好除灭箇星坏掉地垵个主顾。」¹⁹ 就有神明个圣殿开开来天上；也显出其约箱来殿里。又有闪电、许多声音、响雷、地震、等大大雹子。

Mz. XII.

Yiu do ziao-deo yin-c'ih læ t'in-zông; ih-go nyü-nying c'ün-leh nyih-deo, yüih-liang læ gyi kyiah-'ô, deo-zông ta jih-nyi-lih sing go kwun-min. ² Gyi yiu sing, kw'a iao sang-de, we-leh t'ong-kw'u wæ-wæ si.

有大兆头现出来天上。一个女人穿勒日头，月亮来其脚下，头上戴十二粒星个冠冕。² 其有身，快要生了，为了痛苦怀怀嘶。

³ Yi yiu ziao-deo-yin-c'ih læ t'in-zông; ih-keng 'ong-'ong-go do long, yiu ts'ih-go deo, jih-tsah kôh, deo-zông ta ts'ih-ting kwun-min. ⁴ Gyi mi-pô ^[1]lä-leh t'in-zông-go sing-siu sæn-kwu-ts-ih, tiu-læ di-yiang-li. Long lih-læ kw'a-sang-go nyü-

nying min-zin, iao teng sang-lôh, t'eng-ky'üoh gyi na-hwun. ⁵ Gyi sang ih-go ng-ts, ziu-z tsiang-læ-iao yüong t'ih-kweng kwun-djü væn-koh go; keh ng-ts be ta-zông tao Jing-ming teng Gyi zo-we min-zin.

³ 又有兆头现出来天上。一根红红个大龙，有七个头、十只角，头上戴七顶冠冕。⁴ 其尾巴拉勒^[1]天上个星宿三股之一，丢来地垵里。龙立来快生个女人面前，要等生落，吞吃其奶花。⁵ 其生一个儿子，就是将来要用铁棍管住万国个。箇儿子被带上到神明等其座位面前。

[1] 原文错印为 la-leh

⁶ Nyü-nying dao-tao kw'ông-iæ di-fông, Jing-ming sô be-hao-go u-sen; læ keh-deo hao iang gyi ih-ts'in nyi-pah loh-jih nyih.

⁶ 女人逃到旷野地方，神明所备好个乌碎。来箇头好养其一千二百六十日。

⁷ Læ t'in-zông yiu kao-tsin z-ken: Mi-kyüô-leh ta-ling gyi s-ts'a, teng long kao-tsin; long yia ta-ling gyi ^[1]s-ts'a læ kao-tsin, ⁸ tang-feh-ying; læ t'in-zông yia m-c'ü hao deng. ⁹ Keh do long be ken-c'ih, ziu-z lao dzô, yia kyiao-leh Mo-kwe, teng Sah-dæn, su-djông ying-yiu 'en-t'in-ô-go; keh-tsao be ken-c'ih tao di-ying-li; gyi-go s-ts'a yia teng gyi dô-kô ken-c'ih.

⁷ 来天上有交战事干。米迦勒带领其使差，等龙交战。龙也带领其使差^[1]来交战，⁸ 打弗赢。来天上也哋处好庇。⁹ 箇大龙被赶出，就是老蛇，也叫勒魔鬼，等撒但，素常引诱咸天下个。箇遭被赶出到地垵里。其个使差也等其大家赶出。

[1] 原文错印为 s-t'sa

¹⁰ Ngô t'ing-meng læ t'in-zông yiu do-do sing-hyang, wô, "Keh-tsao ah-lah Jing-ming-go kyi-sing, teng neng-ken, teng koh-kô, lin Gyi Kyi-toh-go gyün-ping dzing-dziu-de; ing-we vu-kao ah-lah hyüong-di cü-kwu, ziu-z nyih-yia læ Jing-ming min-zin vu-kao gyi-lah go, z be ken-c'ih-de. ¹¹ Gyi-lah k'ao Siao-ying-go hyüih teng zi sô te-tsing-go dao-li," tang-ying gyi; z feh-t'en-seng p'un-si-ming-go. ¹² Sô-yi t'in teng deng-tih-go cü-kwu hao kw'a-lôh! Keh-sing deng-læ di teng hæ-li go yiu 'o-se! ing-we mo-kwe yiu do-do ô-wông ling-djôh ng: gyi hyiao-teh zi-go z-'eo m-to-siao-de."

¹⁰ 我听闻来天上有大大声响，话，「箇遭阿拉神明个救星、等能干、等国家、连其基督个权柄成就了。因为诬告阿拉兄弟主顾，就是日夜来神明面前诬告其拉个，是被赶出了。¹¹ 其拉靠小羊个血等自所对证个道理，打赢其。是弗

贪生拚死命个。¹² 所以天等庵的个主顾好快乐！箇星庵来地等海里个有祸祟！因为魔鬼有大大慳惶临着尔。其晓得自个时候旣多少了。」

¹³ Long k'en-kyin zi be ken-c'ih tao di-jiang-li, ziu pih-næn sang ng-ts go nyü-nying. ¹⁴ Yiu do lao-ing-go liang-tsah yih-sao s-peh nyü-nying, hao fi-tao gyi-zi sô deng-go kw'ông-iæ di-fông: keh-deo hao iang gyi ^[1]ih-nyin, liang-nyin, teng pun-nyin, ky'i to-bi dzô-go min-zin.

¹³ 龙看见自被赶出到地垵里，就逼难生儿子个女人。¹⁴ 有大老鹰个两只翼梢赐拨女人，好飞到其自所庵个旷野地方。箇头好养其一年、两年、等半年^[1]，去躲避蛇个面前。

[1] 'ôh-wô, ih-kyi, liang-kyi, teng pun-kyi. 或话，一季，两季，等半季。（原注）

¹⁵ Dzô ziu dzong gyi k'eo-li t'u-c'ih shü ziang ih-da 'o ka, læ nyü-nying 'eo-pe, iao t'eng-gyi-diao. ¹⁶ Di pông-dzu keh nyü-nying, ziu k'æ-k'eo, t'eng long k'eo-li sô t'u-c'ih-go keh-da 'o. ¹⁷ Long ô-wông keh nyü-nying, tseo-ky'i teng gyi yü-to-go ts-seng tang-tsiang, ziu-z siu Jing-ming-go kyiaë, nyiah Yiæ-su Kyi-toh te-tsing go cü-kwu.

¹⁵ 蛇就从其口里吐出水像一埭河介，来女人后背，要吞其掉。¹⁶ 地帮助箇女人，就开口，吞龙口里所吐出个箇埭河。¹⁷ 龙慳惶箇女人，走去等其余多个子孙打仗，就是守神明个诫，捏耶稣基督对证个主顾。

Mz. XIII.

Ngô lih-læ hæ-pin sô-t'æn-li, k'en-kyin ih-tsah yia-siu dzong hæ-li tseo-zông, yiu ts'ih-go deo, jih-tsah kôh; deo-zông sia sih-doh-go ming-z. ² Ngô sô k'en-kyin-go yia-siu ziang pao; gyi kyiah ziang yüong; gyi k'eo ziang s-ts-go k'eo. Keh long ziu pô zi-go neng-ken," zo-we, teng do gyün-ping, s-peh gyi. ³ Ngô k'en-kyin gyi ih-go deo ziang be tang-sông kw'a-si ka; gyi kw'a-si-go sông-'eng i-hao. 'En-t'in-'ô tu hyi-gyi keng-dzong keh yia-siu. ⁴ Gyi-lah ziu pa s gyün-ping peh yia-siu go long, yia pa yia-siu wô, "Jü ziang keh yia-siu? Jü neng-keo teng gyi kao-tsin?" ⁵ Yiu s-peh gyi kông do-wô sih-doh-go cü-pô; yi s-peh gyi gyün-ping hao tso z-ken s-jih-nyi-ko yüih. ⁶ Gyi k'æ-k'eo, sih-doh Jing-ming, sih-doh Gyi-go ming-deo, teng Gyi tsiang-bong, teng deng-læ t'in-zông go cü-kwu. ⁷ Yi peh gyi hao teng sing-du kao-tsin, tang-ying gyi-lah; ping-ts'ia yiu gyün-ping s-peh gyi hao kwun-djü cong dzoh-

veng, pah-sing, k'eo-ing, koh-kô. ⁸ Deng-læ di-zông go nying tu we pa gyi, ziu-z dzong k'æ-bih yi-læ be sah-diao Siao-ying-go weh-ming ts'ah-ts-li, keh-sing m̃-teh teng ming-z go cü-kwu. ⁹ Yiu ng-to go cü-kwu kæ t'ing. ¹⁰ Væn-pah lo-liah-go, yia we be lo-liah; yüong tao sah-nying-go, yia we be tao sah-diao. Sing-du-go jing-næ teng siang-sing ziu dzæ-ü keh u-sen.

我立来海边沙滩里，看见一只野兽从海里走上，有七个头、十只角；头上写褻渎个名字。² 我所看见个野兽像豹。其脚像熊。其口像狮子个口。箇龙就把自个能干、座位、等大权柄，赐拨其。³ 我看见其一个头像被打伤快死介。其快死个伤痕医好。咸天下都稀奇跟从箇野兽。⁴ 其拉就拜赐权柄拨野兽个龙，也拜野兽话，「谁像箇野兽？谁能够等其交战？」⁵ 有赐拨其讲大话褻渎个嘴巴；又赐拨其权柄好做事干四十二个月。⁶ 其开口，褻渎神明，褻渎其个名头、等其帐篷、等庵来天上个主顾。⁷ 又拨其好等圣徒交战，打赢其拉；并且有权柄赐拨其好管住众族份、百姓、口音、国家。⁸ 庵来地上个人都会拜其，就是从开辟以来被杀掉小羊个活命册子里，箇星旣得登名字个主顾。⁹ 有耳朵个主顾该听。¹⁰ 凡百掳掠个，也会被掳掠；用刀杀人个，也会被刀杀掉。圣徒个忍耐等相信就在于箇乌碎。

¹¹ Ngô yi k'en-kyin ih-tsah yia-siu dzong di-ying tseo-zông, yiu liang-tsah kôh ziang siao-ying; kông shih-wô ziang long ka. ¹² Gyi we công-kwun di-ih-tsah yia-siu, ziu-z be tang-sông kw'a-si 'eo-deo i-hao-go. ¹³ Gyi yi tso ?do gyi-z, cü-s-teh ho dzong t'in kông-lôh di-ying læ nying-go min-zin, ¹⁴ t'ôh sô s-peh gyi go gyün-ping læ yia-siu min-zin tso gyi-z, hao mi-'ôh di-zông deng-tih-go nying, yi kao-su di-zông deng-tih-go nying kæ we-leh be tao sông-'æ wa weh-tong-go yia-siu, tso ngeo-ziang. ¹⁵ Gyi yiu gyün-ping s ling-ky'i peh keh yia-siu-go ngeo-ziang, s-teh yia-siu-go ngeo-ziang yi we kông shih-wô, yi we peh keh-sing feh pa yia-siu ngeo-ziang cü-kwu tu be sah-diao. ¹⁶ [1] Ping-ts'ia gyi s-teh cong-nying, feh-leng do siao, fu-kwe bing-zin, tso nu-boh feh-tso nu-boh, tu læ jing-tsah-siu 'ôh-tsia ngah-kôh-deo tang ih-k'o ing tso kyi-nying. ¹⁷ Djü-leh yiu yia-siu-go ming-z, 'ôh-tsia gyi ming-z-go su-moh tang-ing-liao cü-kwu, tu feh-hyü ma-tsing ma-c'ih. ¹⁸ Dzæ-ü keh u-sen yiu ts'ong-ming. Yiu cü-sih go nying hao sôn yia-siu-go su-moh, ing-we z nying-go su-moh: gyi su-moh loh-pah loh-jih loh.

¹¹ 我又看见一只野兽从地垵走上，有两只角像小羊；讲说话像龙介。¹² 其会掌管第一只野兽，就是被打伤快死后头医好个。¹³ 其又做大奇事，致使得火从天降落地垵来人个面前，¹⁴ 托所赐拨其个权柄来野兽面前做奇事，好迷惑地上庵的个人，又告诉地上庵的个人该为了被刀伤害还活东个野兽，做偶像。¹⁵ 其有权柄赐灵气拨箇野兽个偶像，使得野兽个偶像又会讲说话，又会拨箇星弗

拜野兽偶像主顾都被杀掉。¹⁶ 并且^[1]其使得众人，弗论大小、富贵贫贱、做奴仆弗做奴仆，都来顺只手或者额角头打一颗印做记认。¹⁷ 除了有野兽个名字，或者其名字个数目打印了主顾，都弗许买进卖出。¹⁸ 在于箇乌碎有聪明。有知识个人好算野兽个数目，因为是人个数目。其数目六百六十六。

[1] 原文错印为 Ping-t'sia

Mz. XIV.

Ngô ih-k'en yi k'en-kyin Siao-jiang lih-læ Shing-sæn zông, yiu? jih-s væn s-ts'in nying teng Gyi dong-de, ngah-kôh-zông tu yiu Gyi-go ming-z teng Gyi Ah-tia-go ming-z sia-tih.² Ngô t'ing-meng t'in-zông yiu sing-hyang ziang hyü-to shü-go sing-hyang, ziang do-do le-go sing-hyang: ngô sô t'ing-meng-go sing-ing yia ziang dæn-gying-go cü-kwu læ-tih dæn-gying go sing-ing.³ Gyi-lah læ zo-we-go min-zin, teng s-go seng-veh, lin keh-sing tsiang-lao-go min-zin ko-ts'ông ts'oh-sing-go tsæn-me-s. Djü-leh dzong di-zông be c'ü-joh-go jih-s-væn s-ts'in nying ts-nga, m-nying neng-keo 'ôh keh-go tsæn-me-s.⁴ Gyi-lah feh be nyü-seh sô tin-u, z^[1] ts'ing-kyih-go cü-kwu; feh-leng Siao-jiang tao 'ah-li ky'i, gyi-lah tu keng-djôh Gyi. Gyi-lah dzong nying-go cong-nyiang be c'ü-joh, tso zông-sing ko-ts peh Jing-ming teng Siao-jiang.⁵ Gyi-lah k'eo-li ih-ngæn m-neh hwông-wô; z læ Jing-ming zo-we min-zin m-yüô-tin-go.

我一看，又看见小羊立来郇山上，有十四万四千人等其同队，额角上都有其个名字等其阿爹个名字写的。² 我听闻天上有声响像许多水个声响、像大大雷个声响。我所听闻个声音也像弹琴个主顾来的弹琴个声音。³ 其拉来座位个面前、等四个生物、连箇星长老个面前歌唱簇新个赞美诗。除了从地上被取赎个十四万四千人之外，旣人能够学箇个赞美诗。⁴ 其拉弗被女色所玷污，是清洁个^[1]主顾。弗论小羊到何里去，其拉都跟着其。其拉从人个中央被取赎，做尝新果子拨神明等小羊。⁵ 其拉口里一眼旣得谎话；是来神明座位面前旣瑕点个。

[1] 'ôh-wô; dong-sing-go. 或话；童身个。（原注）

⁶ Ngô yi k'en-kyin ih-go t'in-s fi-læ t'in-k'ong-li, yiu üong-yün-go foh-ing, hao djün-peh di-zông deng-tih-go nying, teng ih-ts'ih-go koh-kô, dzoh-veng, k'eo-ing, pah-sing; ⁷ do-do sing-hyang wô, "Kæ p'ô-gyü Jing-ming, kwe yüong-wô peh Gyi, ing-we Gyi sing-p'un-go z-'eo yi-kying tao-de: yüong pa-pa keh-we zao t'in, di, hæ, teng shü-nyün go Cü."

⁶ 我又看见一个天使飞来天空里，有永远个福音，好传拨地上庵的个人、等一切个国家、族份、口音、百姓。⁷ 大大声响话，「该怕惧神明，归荣华拨其，因为其审判个时候已经到了。用拜拜箇位造天、地、海、等水源个主。」

⁸ Yi yiu ih-go t'in-s keng-leh gyi 'eo-pe, wô, "Tih-tao-de! do Pô-pi-leng tih-tao-de! ing-we s-teh væn-koh ky'üoh gyi ying-lön c'oh-nu-go tsiu.

⁸ 又有一个天使跟勒其后背，话，「跌倒了！大巴比伦跌倒了！因为使得万国吃其淫乱触怒个酒。」

⁹ Yi yiu di-sæn-go t'in-s keng-leh gyi 'eo-pe, do-do sing-hyang wô, "Jü-ko yiu nying pa yia-siu teng gyi ngeo-ziang, ziu gyi ing læ ngah-kôh-zông 'ôh-tsia siu-li go, ¹⁰ gyi pih-iao ky'üoh Jing-ming ô-wông-go tsiu, z m-kao soh-go kah-dzeh, sia læ Gyi ô-wông pe-ts-li; yia iao be ho teng liu-wông ziu-kw'u læ sing-jün t'in-s teng Siao-ziang-go min-zin. ¹¹ Gyi-lah t'ong-kw'u-go in hyüing-zông üong-yün feh-hyih. Keh-sing pa yia-siu teng gyi ngeo-ziang, ziu gyi ming-z tang-ing-go, nyih-yia feh-teh en-tæn." ¹² Pao-siu Jing-ming-go lih-fah teng Yiæ-su-go siang-sing, keh-sing sing-du-go jing-næ ziu dzæ-ü keh u-sen.

⁹ 又有第三个天使跟勒其后背，大大声响话，「如果有人拜野兽等其偶像，受其印来额角上或者手里个，¹⁰ 其必要吃神明愠惶个酒，是旤告啥个夹杂，写来其愠惶杯子里；也要被火等硫磺受苦来圣善天使等小羊个面前。¹¹ 其拉痛苦个烟熏上永远弗歇。箇星拜野兽等其偶像，受其名字打印个，日夜弗得安耽。」¹² 保守神明个律法等耶稣个相信，箇星圣徒个忍耐就在于箇乌碎。

¹³ Ngô t'ing-meng dzong t'in-zông yiu sing-hyang teng ngô wô, "Ng hao sia-lôh, keh-sing si-go cü-kwu yiu foh-ky'i, ziu-z dzong-kying-yi-'eo joh-ü Cü si-go Sing-Ling wô, "Z-go, s-teh gyi-lah hao en-sih gyi-go lao-kw'u; gyi-lah sang-weh yia we keng-djôh gyi."

¹³ 我听闻从天上有声响等我话，「尔好写落，箇星死个主顾有福气，就是从今以后属于主死个。」圣灵话，「是个，使得其拉好安息其个劳苦；其拉生活也会跟着其。」

¹⁴ Ngô ih-k'en, yi k'en-kyin ih-tô bah-yüing; yüing-teng yiu ih-we ziang nying-go Ng-ts zo-tih; deo-zông ta kying-ts-go kwun-min, siu-li nyiah fong-kw'a-go lin-tao. ¹⁵ Yi yiu ih-go t'in-s tseo-c'ih sing-din, do-do sing-hyang eo zo yüing go cü-kwu wô, "Hao yüong ng-go lin-tao siu-keh; ing-we siu-keh-go z-'eo yi-kying tao-de, di-zông-go pah-koh yi-kying joh-de." ¹⁶ Zo yüing go cü-kwu ziu yüong lin-tao læ di-zông, di be siu-keh.

¹⁴ 我一看，又看见一朵白云。云顶有一位像人个儿子坐的；头上戴金子个冠冕，手里捏锋快个镰刀。¹⁵ 又有一个天使走出圣殿，大大声响讴坐云个主顾话，「好用尔个镰刀收割；因为收割个时候已经到了，地上个百谷已经熟了。」¹⁶ 坐云个主顾就用镰刀来地上，地被收割。

¹⁷ Yi yiu ih-go t'in-s tseo-c'ih t'in-zông-go sing-din, yia nyiah-leh fong-kw'a-go lin-tao. ¹⁸ Tsæ yiu ih-go t'in-s tseo-c'ih tsi-dæn, gyi yiu công-kwun ho-go gyün-ping; ziu do-do sing-hyang eo nyiah fong-kw'a lin-tao go cü-kwu wô, "Hao yüong ng fong-kw'a-go lin-tao, siu-tsing di-zông bu-dao-jü-go gyiu; ing-we bu-dao-ko yi-kying joh-de." ¹⁹ T'in-s ziu yüong gyi-go lin-tao læ di-zông, siu-tsing di-zông-go bu-dao-jü, tiu læ Jing-ming ô-wông do tsiu-tsô-li. ²⁰ Læ zing-nga ziu nao keh tsiu-tsô, hyüih dzong tsiu-tsô liu-c'ih, mô-kyiang-zing ka kao, di-fông da-iah loh-pah li lu.

¹⁷ 又有一个天使走出天上个圣殿，也捏勒锋快个镰刀。¹⁸ 再有一个天使走出祭坛，其有掌管火个权柄；就大大声响讴捏锋快镰刀个主顾话，「好用尔锋快个镰刀，收进地上葡萄树个球；因为葡萄果已经熟了。」¹⁹ 天使就用其个镰刀来地上，收进地上个葡萄树，丢来神明愜惶大酒榨里。²⁰ 来城外就踔箇酒榨，血从酒榨流出，马缰绳介高，地方大约六百里路。

Mz. XV.

Ngô tsæ k'en-kyin t'in-zông yiu ih-go ziao-deo, yi do, yi hyi-gyi; ziu-z ts'ih-go t'in-s công-kwun kyih-sah keh ts'ih-go tsæ-næn; ing-we Jing-ming-go ô-wông dzong-ts' wun-de.

我再看见天上有一个兆头，又大、又稀奇；就是七个天使掌管结煞箇七个灾难；因为神明个愜惶从此完了。

² Ngô k'en-kyin ziang po-li teng ho 'o-long-tih-go hæ; yia k'en-kyin tang-ying yia-siu teng gyi ngeo-ziang, teng gyi-go ing, teng gyi ming-z su-moh go, tu lih-læ po-li hæ-zông, nyiah-leh Jing-ming-go gying. ³ Gyi-lah ko-ts'ông Jing-ming nu-boh Mo-si-go tsæn-me-s, teng Siao-ziang-go tsæn-me-s, z-ka wô, "Djün-neng-go Cü Jing-ming, Ng-go tsôh-yüong yi do, yi hyi-gyi; sing-du-go Wông-ti, Ng-go tsôh-we yi kong-yi, yi dzing-jih. ⁴ Cü jü we feh-p'ô-gyü Ng, feh tsæn-me Ng-go ming-deo? ing-we tsih-yiu Ng z sing-jün-go. Væn-koh pih-ding we tseo-long, læ Ng-go min-zin pa-voh; ing-we Ng-go sing-p'un yi-kying hyin-c'ih-de."

² 我看见像玻璃等火和拢的个海；也看见打赢野兽等其偶像、等其个印、等其名字数目个，都立来玻璃海上，捏勒神明个琴。³ 其拉歌唱神明奴仆摩西个赞美诗、等小羊个赞美诗，是介话，「全能个主神明，尔个作用又大、又稀奇。圣徒个皇帝，尔个作为又公义、又诚实。⁴ 主谁会弗怕惧尔，弗赞美尔个名头？因为只有尔是圣善个。万国必定会走拢，来尔个面前拜服；因为尔个审判已经显出了。」

⁵ Keh-sing z-ken 'eo-deo, ngô ih-k'en ziu k'en-kyin læ t'in-zông yiu te-tsing tsiang-bong-go Sing-din k'æ-kæn. ⁶ Cōng-kwun ts'ih-yiang tsæ-næn keh-sing ts'ih-go t'in-s tseo-c'ih sing-din, yiu ts'ing-kyih shih-bah-go i-zông c'ün-tih, hyüong-kwun-deo kyi-leh kying-ts-go ta. ⁷ Keh s-go seng-veh li-hyang yiu ih-go pô ts'ih-go kying hyiang-lu, tsi-mun üong-weh Jing-ming-go ô-wông, kao-fu keh-sing ts'ih-go t'in-s. ⁸ Sing-din, we-leh Jing-ming-go yüong-wô teng Gyi neng-ken, ziu be in c'ong-mun; yia m-yiu nying neng-keo tseo-tsing sing-din-li, teng-tao keh-ts'ih-go t'in-s ts'ih-yiang tsæ-næn kông-wun.

⁵ 箇星事干后头，我一看，就看见来天上有对证帐篷个圣殿开间。⁶ 掌管七样灾难箇星七个天使走出圣殿，有清洁雪白个衣裳穿的，胸腕头系勒金子个带。⁷ 箇四个生物里向有一个把七个金香炉，满永活神明个慇懃，交付箇星七个天使。⁸ 圣殿，为了神明个荣华等其能干，就被烟充满；也既有人能够走进圣殿里，等到箇七个天使七样灾难讲完。

Mz. XVI.

Ngô t'ing-meng dzong Sing-din-li yiu do-do sing-hyang eo keh ts'ih-go t'in-s wô, "Ng hao ky'i, pô hyiang-lu li-hyang Jing-ming-go ô-wông tao læ di-yiang-li."

我听闻从圣殿里有大大声响讴箇七个天使话，「尔好去，把香炉里向神明个慇懃倒来地垠里。」

² Di-ih-go t'in-s tseo-c'ih, pô hyiang-lu tao læ di-zông; keh-sing yiu yia-siu-go ing, pa gyi ngeo-ziang cü-kwu, ziu sang ôh-doh-go ts'ông.

² 第一个天使走出，把香炉倒来地上。箇星有野兽个印、拜其偶像主顾，就生恶毒个疮。

³ Di-nyi-go t'in-s pô hyiang-lu tao læ hæ-li; hæ ziu pin-tso si-nying-go hyüih; hæ-li weh-dong-go tong-si tu si-de.

³ 第二个天使把香炉倒来海里。海就变做死人个血；海里活动个东西都死了。

⁴ Di-sæn-go t'in-s pô hyiang-lu tao læ kông-'o teng shü-nyün-li; tu pin tso hyüih. ⁵ Ngô ziu t'ing-meng công-kwun shü go t'in-s wô, "Ng yin-dzæ, zin-deo ^[1]læ-tong, sing-jün-go Cü, z tsing-dzih-go; ing-we Ng z-ka læ-tih p'un-tön. ^[2]⁶ Gyi-lah yi-kying liu-c'ih sing-du teng sin-cü-nying-go hyüih; næn-kæn Ng we pô hyüih peh gyi-lah ky'üoh; keh z ing-kæ-go." ⁷ Ngô yi t'ing-meng tsi-dæn-li yiu bih-go sing-hyang, z-ka wô, "Z-go; djün-neng-go Cü Jing-ming, Ng-go sing-p'un z dzing-jih-go, z kong-yi-go."

⁴ 第三个天使把香炉倒来江河等水源里；都变做血。⁵ 我就听闻掌管水个天使话，「尔现在、前头来东^[1]、圣善个主，是正直个。因为尔是介来的判断。⁶^[2]其拉已经流出圣徒等先知人个血；难间尔会把血拨其拉吃；箇是应该个。」⁷ 我又听闻祭坛里有别个声响，是介话，「是个。全能个主神明，尔个审判是诚实个，是公义个。」

[1] 'ôh-wô, 'eo-deo læ-tong-go. 或话，后头来东个。（原注）

[2] 原书此处缺编号 6

⁸ Di-s-go t'in-s pô hyiang-lu tao læ nyih-deo-li; ziu yiu gyün-ping s-peh gyi hao yüong ho pih nying. ⁹ Nying be ^[1]pih-leh nyih-sah, ziu sih-doh Jing-ming-go ming-deo, ziu-z ^[2]s gyün-ping kông keh-sing tsæ-næn go; yia feh hwe-kæ, feh kwe yüong-wô peh Gyi.

⁸ 第四个天使把香炉倒来日头里。就有权柄赐拨其好用火熯人。⁹ 人被熯勒热煞^[1]，就亵渎神明个名头，就是赐权柄降箇星灾难个^[2]；也弗悔改，弗归荣华拨其。

[1] 'ôh-wô, me-sah. 或话，焯煞。（原注）

[2] 'ôh-wô, công-kwun keh-sing tsæ-næn-go gyün-ping. 或话，掌管箇星灾难个权柄。（原注）

¹⁰ Di-ng-go t'in-s pô hyiang-lu tao læ yia-siu-go zo-we-zông; gyi koh-kô tu heh-en; gyi-lah kw'u-feh-ko ngao zi-go zih-deo; ¹¹ we-leh gyi t'ong-kw'u ts'ông-doh, pông-hwe t'in-zông-go Jing-ming, feh k'eng hwe-kæ gyi-lah 'ang-we.

¹⁰ 第五个天使把香炉倒来野兽个座位上。其国家都黑暗。其拉苦弗过咬自个舌头。¹¹ 为了其痛苦疮毒，谤毁天上个神明，弗肯悔改其拉行为。

¹² Di-loh-go t'in-s pô hyiang-lu tao læ Pah-lah do-'o; gyi shü ziu sao-de, s-teh tong-pin kyüing-wông-go lu hao be-bæn.

¹² 第六个天使把香炉倒来伯拉大河。其水就燥了，使得东边君王个路好备办。

¹³ Ngô k'en-kyin yiu sæn-go ao-tsao kyü, ziang ts'ing-wô ka, dzong long-go k'eo-li, teng yia-siu-go k'eo-li, teng kô sin-cü nying-go k'eo-li ka c'ih-læ. ¹⁴ Gyi-lah z ôh-kyü-go ling, neng-keo tso gyi-z, tseo-c'ih ky'i jü-long 'en-t'in-ô keh-sing kyüing-wông tao djün-neng Jing-ming keh do nyih-ts-go kao-tsin. ¹⁵ "Ts'ia-k'en, Ngô ziang zeh ka læ. Væn-pah kying-sing, k'en-siu i-zông, feh we c'ih-poh tseo, feh s-teh nying k'en-kyin gyi wông-k'ong go, z yiu foh-ky'i." ¹⁶ Gyi jü-long keh-sing kyüing-wông tao ih-t'ah di-fông, tsiao Hyi-pah-læ k'eo-ing kyiao-leh Ûô-mô-ngah-teng.

¹³ 我看见有三个麀麀鬼，像青蛙介，从龙个口里、等野兽个口里、等假先知人个口里介出来。¹⁴ 其拉是恶鬼个灵，能够做奇事，走出去聚拢咸天下箇星君王到全能神明箇大日子个交战。¹⁵ 「且看，我像贼介来。凡百警醒，看守衣裳，弗会出膊走，弗使得人看见其惶恐个，是有福气。」¹⁶ 其聚拢箇星君王到一埧地方，照希伯来口音叫勒亚马额顿。

¹⁷ Di-ts'ih-go t'in-s pô hyiang-lu tao læ t'in-k'ong-li; ziu yiu do-do sing-hyang dzong t'in-zông sing-din-go zo-we-li ka c'ih-læ, z-ka wô, "Wun-de." ¹⁸ Ziu yiu hyü-to sing-hyang, hyiang-le, sin-din, yia yiu ting ^[1]do di-cing. Dzung nying dzæ-shü yi-læ m-yiu keh-cong-ka do-go di-cing. ¹⁹ Keh do dzing-ts feng-k'æ sæn-gyüih; lih-koh-go dzing-ts tu tao-t'ah. Do Pô-pi-leng peh Jing-ming kyi-teh, pô Gyi-zi ting ô-wông-go tsiu-pe peh gyi. ²⁰ Ih-ts'ih-go hæ-tao tu dao-tseo, sæn-ling tu k'en-feh-kyin. ²¹ Ping-ts'ia yiu boh-ts, da-iah ih-kyüing ka djong, dzong t'in kông-lôh læ nying-go sing-zông. Nying be boh-ts tang-sông, ziu sih-doh Jing-ming, ing-we gyi tang-sông li-'æ.

¹⁷ 第七个天使把香炉倒来天空里。就有大大声响从天上圣殿个座位里介出来，是介话，「完了。」¹⁸ 就有许多声响、响雷、闪电，也有顶大^[1]地震。从人在世以来既有箇种介大个地震。¹⁹ 箇大城子分开三槪；列国个城子都倒塌。大巴比伦拨神明记得，把其自顶慄惶个酒杯拨其。²⁰ 一切个海岛都逃走，山岭都看弗见。²¹ 并且有雹子，大约一钧介重，从天降落来人个身上。人被雹子打伤，就亵渎神明，因为其打伤厉害。

[1] 此处原书错印为 dô

Mz. XVII.

Nyiah ts'ih-go hyiang-lu keh ts'ih-go t'in-s, gyi-cong ih-go tseo-long, teng ngô wô, “Ng læ; keh zo læ? hyü-to shü min-teng go do ying-vu, gyi-go sing-p'un ngô we peh ng k'en. ² Di-zông-go kyüing-wông z teng gyi kæn-ying; di-zông deng-tih-go nying z ky'üoh-tse gyi ying-lön-go tsiu.” ³ Ngô mong sing-ling ken-dong, t'in-s ling ngô tao kw'ông-iæ di-fông; ziu k'en-kyin ih-go nyü-nying, zo-leh 'ong-go yia-siu, yiu ts'ih-go deo. jih-tsah kôh, mun-sing yiu sih-doh-go ming-z. ⁴ Keh-go nyü-nying c'ün-leh ts teng 'ong, yiu kying-ts, pao-zah, cü-ts tsông-sih; siu-li nyiah-leh kying-ts tsiu-pe, tsi-mun k'o-u-go ǵa-c'ü, teng gyi ying-lön-go u-ǵe: ⁵ læ ngah-kôh-li yiu ming-z sia-tih wô, “Ao-miao, do Pô-pi-leng, di-zông cong ying-vu teng k'o-u-go ah-nyiang.” Ngô k'en-kyin keh nyü-nying ky'üoh-tse sing-du-go hyüih, teng te-tsing Yiæ-su cü-kwu-go hyüih. Ngô ih k'en-kyin, ziu do-nyiang hyi-gyi.

捏七个香炉箇七个天使，其中一个走拢，等我话，「尔来；箇坐来许多水面顶个大淫妇，其个审判我会拨尔看。² 地上个君王是等其奸淫；地上庵的个人是吃醉其淫乱个酒。」³ 我蒙圣灵感动，天使领我到旷野地方；就看见一个女人，坐勒红个野兽，有七个头、十只角，满身有褻渎个名字。⁴ 箇个女人穿勒紫等红，有金子、宝石、珠子装饰；手里捏勒金子酒杯，𪔐满可恶个坏处，等其淫乱个污秽。⁵ 来额角里有名字写的话，「奥妙，大巴比伦，地上众淫妇等可恶个阿娘。」⁶ 我看见箇女人吃醉圣徒个血，等对证耶稣主顾个血。我一看见，就大样稀奇。

⁷ T'in-s teng ngô wô, “Ng dza-we hyi-gyi? Ngô we pô keh-go nyü-nying, teng pe gyi yiu ts'ih-go deo jih-tsah kôh go yia-siu, keh ao-miao i-s, wô-hyang ng dao. ⁸ Ng sô k'en-kyin-go yia-siu, zin-deo yiu-go, yin-dzæ ǵn-teh, 'eo-deo we dzong ǵn-ti-k'ang-li ka c'ih-læ, kwe-ü mih-vông. Væn-pah deng læ di-zông go, gyi ming-z dzong k'æ-bih yi-læ m-neh sia læ weh-ming ts'ah-ts-li go, k'en-kyin keh zin-deo yiu, yin-dzæ ǵn-teh, 'eo-deo yiu-go yia-siu, ziu we hyi-gyi. ⁹ Dzæ-ü keh u-sen yiu ts'ong-ming-go sing. Keh ts'ih-go deo z nyü-nying sô zo-go ts'ih-zo sæn, ¹⁰ yi z ts'ih-go wông-ti. Ng-go yi-kying ba-diao, ih-go wa læ-tong, wa-yiu ih-go feh-zing læ; gyi ih læ, yia tsih dzæn-z læ-tong. ¹¹ Keh zin-deo yiu, yin-dzæ m-neh-go yia-siu, ziu-z di-pah-go, yia dzæ-ü keh ts'ih-go ts-nen, cong-ü kwe-tao mih-vông.

⁷ 天使等我话，「尔咋会稀奇？我会把箇个女人，等背其有七个头十只角个野兽，箇奥妙意思，话向尔道。⁸ 尔所看见个野兽，前头有个，现在旣得，后头

会从旫底坑里介出来，归于灭亡。凡百庵来地上个，其名字从开辟以来旫得写来活命册子里个，看见箇前头有、现在旫得、后头有个野兽，就会稀奇。⁹ 在于箇乌碎有聪明个心。箇七个头是女人所坐个七座山，¹⁰ 又是七个皇帝。五个已经败掉，一个还来东，还有一个弗曾来；其一来，也只暂时来东。¹¹ 箇前头有、现在旫得个野兽，就是第八个，也在于箇七个之内，终于归到灭亡。

¹² “Ng sô k'en-kyin-go jih-tsah kôh z jih-go wông-ti. Gyi-lah wa feh-zing teh-djôh koh-kô; 'eo-deo teng yia-siu dong ziu wông-ti-go gyün-ping, yia tsih-leh ih-zông. ¹³ Gyi-lah tu dong-sing-'eh-i pô zi-go neng-ken gyün-ping kao-fu peh yia-siu. ¹⁴ Gyi-lah we teng Siao-jiang kao-tsin, Siao-jiang pih-ding teh-sing; ing-we Gyi z væn-cü-ts Cü, væn-wông-ts Wông; keng-djôh Gyi go tu z be dziao-læ, mong kæn-shün, cong-sing-go cü-kwu.”

¹² 「尔所看见个十只角是十个皇帝。其拉还弗曾得着国家；后头等野兽同受皇帝个权柄，也只勒一晌。¹³ 其拉都同心合意把自个能干权柄交付拨野兽。¹⁴ 其拉会等小羊交战，小羊必定得胜；因为其是万主之主，万王之王；跟着其个都是被召来、蒙拣选、忠信个主顾。」

¹⁵ Gyi yi teng ngô wô, “Ng sô k'en-kyin-go hyü-to shü, ying-vu sô zo-go, ziu-z pah-sing, cong-nying, koh-veng, k'eo-ing. ¹⁶ Ng sô k'en-kyin-go yia-siu teng keh-sing jih-tsah kôh we 'eng keh ying-vu, s-teh gyi gyüong-kw'u c'ih-poh-go; yia we ky'üoh gyi-go nyüoh, yüong ho me gyi. ¹⁷ Ing-we Jing-ming yi-kying ^[1]ling-djôh gyi-lah sing hao tso-dzing Gyi-go ts-i, s-teh gyi-lah ih-sing-ih-i pô zi-go koh-kô kao-fu yia-siu, teng-tao Jing-ming-go shih-wô tu tso-dzing. ¹⁸ Ng sô k'en-kyin-go nyü-nying z kæ-kwun di-zông kyüing-wông go do dzing-ts.”

¹⁵ 其又等我话，「尔所看见个许多水，淫妇所坐个，就是百姓、众人、国份、口音。¹⁶ 尔所看见个野兽等箇星十只角会恨箇淫妇，使得其穷苦出膊个；也会吃其个肉，用火焅其。¹⁷ 因为神明已经临着^[1]其拉心好做成其个旨意，使得其拉一心一意把自个国家交付野兽，等到神明个说话都做成。¹⁸ 尔所看见个女人是该管地上君王个大城子。」

[1] 'ôh-wô, ken-dong. 或话，感动。（原注）

Keh-sing z-ken 'eo-deo ngô yi k'en-kyin ih-go t'in-s dzong t'in kông-lôh-læ, tsih-công do gyün-ping; ping-ts'ia di be gyi yüong-wô tu kwông-ming. ² Gyi ziu do-do sing-hyang eo-c'ih-læ, wô, "Tih-tao-de, do Pô-pi-leng tih-tao-de! næn-kæn tso-leh kyü deng-go u-sen, cong zia-ling-go dzao-yüih, teng væn-pah ao-tsao eo-tseng tiao-go dzao-yüih. ³ Ing-we væn-koh tu ky'üoh gyi ying-lôn c'oh-nu-go tsiu; di-zông-go kyüing-wông tu teng gyi kæn-ying; di-zông-go k'ah-shông tu we-leh gyi shæ-wô tao gyih-deo fah-dzæ-de."

箇星事干后头我又看见一个天使从天降落来，执掌大权柄；并且地被其荣华都光明。² 其就大大声响讴出来，话，「跌倒了，大巴比伦跌倒了！难间做了鬼庵个乌碎，众邪灵个巢穴，等凡百麤糟呕憎鸟个巢穴。³ 因为万国都吃其淫乱触怒个酒；地上个君王都等其奸淫；地上个客商都为了其奢华到极头发财了。」

⁴ Ngô yi t'ing-meng t'in-zông yiu sing-hyang wô, "Ngô-go pah-sing, yüong li-k'æ gyi, sæn-leh ng yiu-veng gyi-go ze, dô-kô ziu gyi-go tsæ-næn; ⁵ ing-we gyi ze-ôh t'ao t'in Jing-ming yia kyî-teh gyi-go ăa-c'ü. ⁶ Tsiao gyi sô dæ nying-kô, yia z-ka dæ gyi; tsiao gyi-go 'ang-we, kô-be pao gyi; Gyi sô sia læ pe-ts-li go, yia kô-be sia peh gyi. ⁷ Gyi su-djông zi tseng-djong shæ-wô, næn-kæn tsiao-su peh gyi t'ong-kw'u sông-sing. Ing-we gyi sing-li wô, 'Ngô næn-kæn z zo-leh tso wông-'eo, feh-z kwô-vu, feh we teh-cü pe-shông.' ⁸ Keh-lah ih-nyih li-hyang gyi tsæ-næn pih-ding we tao, ziu-z wang-si, t'ong-sông, kyî-hwông, be ho me-sah; ing-we sing-p'un gyi go Cü Jing-ming z do yiu neng-ken."

⁴ 我又听闻天上有声响话，「我个百姓，用离开其，省勒尔有份其个罪，大家受其个灾难；⁵ 因为其罪恶滔天神明也记得其个坏处。⁶ 照其所待人家，也是介待其；照其个行为，加倍报其；其所写来杯子里个，也加倍写拨其。⁷ 其素常自尊重奢华，难间照数拨其痛苦伤心。因为其心里话，『我难间是坐勒做王后，弗是寡妇，弗会得知悲伤。』⁸ 箇拉一日里向其灾难必定会到，就是横死、痛伤、饥荒，被火焠煞。因为审判其个主神明是大有能干。」

^{9, 10} Di-zông-go kyüing-wông, su-djông teng gyi kæn-ying ^[1]shæ-wô-go, we-leh pô gyi kw'eng-kw'u, yün-yün lih-ts, k'en-kyin gyi ho-dziah-go in; ziu we æ-t'ong di-k'oh gyi, wô, "K'o-sih, k'o-sih, do dzing-ts Pô-pi-leng, keh kyin-kwu-go dzing-ts! ih-z-li ng-go sing-p'un tao-de."

^{9, 10} 地上个君王，素常等其奸淫奢华个^[1]，为了把其困苦，远远立仔，看见其火着个烟；就会哀痛啼哭其，话，「可惜，可惜，大城子巴比伦，箇坚固个城子！一时里尔个审判到了。」

[1] 此处原书错印为 shæ-wô-gô

¹¹ Di-zông-go k'ah-shông, yia æ-t'ong di-k'oh gyi, ing-we m-nying tsæ ma gyi ho-veh go. ¹² Gyi ho-veh ziu-z kying, nying, pao-zah, cü-ts, mô-pu, ts-'ong s-sin, pah-ying hyiang-moh; wa-yiu ih-ts'ih ziang-ngô, kwe-djong moh-deo, dong, t'ih, nyüoh-zah-go ky'i-ming; ¹³ wa-yiu nyüoh-kwe, hyiang-liao, hyiang-yiu, jü-hyang, tsiu, yiu, si min-feng, mah, ngeo, yang, mô, ts'ô-ts, nying-go kyi-sing teng weh-ling. ¹⁴ Ng sing-li sô ky'i-mo-go ko-ts yi-kying li-k'æ ng; væn-pah shæ-wô yin-li-go tong-si yia tu li-k'æ ng; ng pih-ding feh we tsæ k'en-kyin gyi.

¹¹ 地上个客商，也哀痛啼哭其，因为旤人再买其货物个。¹² 其货物就是金、银、宝石、珠子、麻布、紫红丝线、百样香木、还有一切象牙、贵重木头、铜、铁、玉石个器皿；¹³ 还有肉桂、香料、香油、乳香、酒、油、细面粉、麦、牛、羊、马、车子、人个肌身等活灵。¹⁴ 尔心里所企慕个果子已经离开尔；凡百奢华艳丽个东西也都离开尔；尔必定弗会再看见其。

¹⁵ Ma keh-sing tong-si we fah-dzæ go k'ah-shông, we-leh p'ô gyi kw'eng-kw'u, yün-yün lih-ts, ziu æ-t'ong di-k'oh, wô, ¹⁶ “K'o-sih, k'o-sih, keh do dzing-ts, c'ün si mô-pu teng ts-'ong ngæn-seh, yüong kying-ts pao-zah teng cü-ts tsông-sih-go! ¹⁷ ing-we ka to-go dzæ-veh ih-z-li mih-diao-de. Væn-pah jün-cü, shü-siu, s-ko keh di-fông go cong-nying, teng hæ-li tso sang-i cü-kwu, tu yün-yün lih-ts, ¹⁸ k'en-kyin gyi ho-dziah-go in, eo-hyang wô, “Jü ziang keh-go do dzing-ts ni!” ¹⁹ Ziu pô hwe-dzing tæ-leh deo, æ-t'ong. di-k'oh, hyiang-hyang wô, “K'o-sih, k'o-sih, keh do dzing-ts! Væn-pah hæ-li yiu jün go, we-leh gyi-go shæ-wô z fah-dzæ; næn-kæn ih-z-li mih-diao-de.

¹⁵ 卖箇星东西会发财个客商，为了怕其困苦，远远立仔，就哀痛啼哭，话，¹⁶ 「可惜，可惜，箇大城子，穿细麻布等紫红颜色，用金子宝石等珠子装饰个！¹⁷ 因为介多个财物一时里灭掉了。凡百船主、水手、驶过箇地方个众人、等海里做生意主顾，都远远立仔，¹⁸ 看见其火着个烟，讴响话，『谁像箇个大城子呢！』¹⁹ 就把灰尘戴勒头，哀痛啼哭，响响话，「可惜，可惜，箇大城子！凡百海里有船个，为了其个奢华是发财；难间一时里灭掉了。

²⁰ Ng t'in, wa-yiu ng sing-jün s-du teng sin-cü-nying, hao we-leh gyi hwunhyi; ing-we Jing-ming læ gyi-go u-sen teng ng sing-ün-de.”

²⁰ 尔天，还有尔圣善使徒等先知人，好为了其欢喜；因为神明来其个乌碎等尔伸冤了。」

²¹ Ziu yiu do neng-ken-go t'in-s pô ih-kw'e zah-deo, ziang ting do mo-bun ka, tiu-leh hæ-li, wô, “Ting-do dzing-ts Pô-pi-leng, pih-jün z-ka teng-z tao-pong, feh we tsæ k'en-kyin gyi. ²² Keh-sing dæn-gying, tsôh-yüôh, c'ü-siao, c'ü-'ao-dong go

sing-ing, feh tsæ læ ng-go cong-nyiang t'ing-meng; pah-tsôh s-vu, feh-tsæ læ ng-go cong-nyiang k'en-kyin; ky'in-mo-go sing-ing, feh tsæ læ ng-go cong-nyiang t'ing-meng; ²³ teng-tsæn-go liang-kwông, feh tsæ læ ng-go cong-nyiang tsiao-djôh; ^[1]sing-lông sing-vu-go sing-ing, feh tsæ læ ng-go cong-nyiang t'ing-meng, ing-we ng-go k'ah-shông z di-zông-go fu-kwe nying; ing-we væn-koh z be ng-go zia-jih mi-ôh-de. ²⁴ Sin-cü-nying, sing-du, teng t'in-ô be sah-diao cong-nying-go hyüih, tu læ keh-deo k'en-kyin.”

²¹ 就有大能干个天使把一块石头，像顶大磨盘介，丢勒海里，话，「顶大城子巴比伦，必然是介登时倒崩，弗会再看见其。²² 箇星弹琴、作乐、吹箫、吹号筒个声音，弗再来尔个中央听闻；百作师父，弗再来尔个中央看见；牵磨个声音，弗再来尔个中央听闻；²³ 灯盏个亮光，弗再来尔个中央照着；新郎^[1]新妇个声音，弗再来尔个中央听闻。因为尔个客商是地上个富贵人；因为万国是被尔个邪术迷惑了。²⁴ 先知人、圣徒、等天下被杀掉众人个血，都来箇头看见。」

[1] 此处原书错印为 sing-long

Mz. XIX.

Keh-sing z-ken 'eo-deo, ngô t'ing-meng læ t'in-zông ziang yiu ih-do-dziao cü-kwu hyiang-hyiang læ-tih wô, “Hah-li-lu-yia! dæn-nyün kyi-u-sing, yüong-wô, tseng-djong, neng-ken, kwe peh Cü, ah-lah Jing-ming! ² Gyi-go sing-p'un yi dzing-jih, yi tsing-dzih; ing-we Gyi yi-kying p'un-tön keh do ying-vu, ziu-z be gyi ying-lön wæ-diao shü-kæn-zông go; yia hyiang gyi-go siu-li p'iao-bah Zi nu-boh liu-hyüih-go ün-wông.” ³ Gyi-lah tsæ wô, “Hah-li-lu-yia! keh ying-vu-go in hyüing-zông üong-yün feh-hyih. ⁴ Keh nyiæn-s-go tsiang-lao teng s-go seng-veh boh-tæn-tao, pa-pa zo-leh zo-we go Jing-ming, wô, “Üô-meng, Hah-li-lu-yia!”

箇星事干后头，我听闻来天上像有一大潮主顾响响来的话，「哈哩路耶！但愿救星、荣华、尊重、能干，归拨主，阿拉神明！² 其个审判又诚实、又正直。因为其已经判断箇大淫妇，就是被其淫乱坏掉世间上个；也向其个手里漂白自奴仆流血个冤枉。」³ 其拉再话，「哈哩路耶！箇淫妇个烟熏上永远弗歇。」⁴ 箇廿四个长老等四个生物伏带倒，拜拜坐勒座位个神明，话，「亚们，哈哩路耶！」

⁵ Dzong zo-we ziu yiu sing-ing c'ih-læ, wô, “Ng-lah tso Gyi nu-boh, p'ô-gyü Gyi go cü-kwu, feh-leng do-siao, tu kæ tsæn-me ah-lah-go Jing-ming.” ⁶ Yi t'ing-

meng ziang ih-do-dziao cü-kwu-go sing-hyang, ziang hyü-to shü-go sing-hyang, ziang do-do le-go sing-hyang, wô, “Hah-li-lu-yia! ing-we Cü, djün-neng-go Jing-ming, z tsih-công wông-ti-go-gyün-ping! ⁷ Ah-lah hao hwun-hyi kw’a-lôh, kwe yüong-wô peh Gyi, ing-we Siao-yiang-go hao-nyih yi-kying tao-de, Sing-vu zi yi-kying be-hao-de.” ⁸ Ziu peh *sing-vu* c’ün ts’ing-kyih shih-kwah-liang-go si mô-pu; keh si mô-pu ziu-z sing-du-go kong-yi.

⁵ 从座位就有声音出来，话，「尔拉做其奴仆，怕惧其个主顾，弗论大小，都该赞美阿拉个神明。」⁶ 又听闻像一大潮主顾个声响、像许多水个声响、像大大雷个声响，话，「哈哩路耶！因为主，全能个神明，是执掌皇帝个权柄。」⁷ 阿拉好欢喜快乐，归荣华拨其，因为小羊个好日已经到了。新妇自己已经备好了。」⁸ 就拨新妇穿清洁雪刮亮个细麻布；箇细麻布就是圣徒个公义。

⁹ Gyi teng ngô wô, “Ng hao sia lôh, Be ts’ing-læ ky’üoh Siao-yiang hao-nyih-tsiu go cü-kwu yiu foh-ky’i.” Yi teng ngô wô, “Keh-sing z Jing-ming-go tsing-wô.”

⁹ 其等我话，「尔好写落，被请来吃小羊好日酒个主顾有福气。」又等我话，「箇星是神明个真话。」

¹⁰ Ngô ziu boh-tao gyi kyiah-’ô, iao pa gyi. Gyi yi teng ngô wô, “S-feh-teh; ngô, teng ng, lin siu Yiæ-su te-tsing go hyüong-di, tu z dong-z-go nu-boh. Ng pa Jing-ming, z-de: ing-we Yiæ-su-go te-tsing z sin-cü-go ling.”

¹⁰ 我就伏倒其脚下，要拜其。其又等我话，「使弗得。我，等尔，连守耶稣对证个兄弟，都是同事个奴仆。尔拜神明，是了。因为耶稣个对证是先知个灵。」

¹¹ Ngô yi k’en-kyin t’in k’æ-k’æ, yiu ih-p’ih bah mô; gyi-tih-go cü-kwu, kyiao-leh Cong-sing Dzing-jih;, Gyi sing-p’un teng kao-tsin tu z yüong kong-yi. ¹² Gyi ngæn-tsing ziang ho-kwông; Gyi deo ta hyü-to kwun-min; yiu ming-z sia-tih, djü Gyi-zi ts-nga m-nying sih-teh-go. ¹³ Gyi zi c’ün nyin-hyüih-go i-zông; Gyi ming-z kyiao-leh “Jing-ming-go Dao.” ¹⁴ Keng Gyi go t’in-zông ping-tsiang tu gyi-leh bah mô, c’ün kyih-bah-go si mô-pu. ¹⁵ Yiu fong-li-go pao-kyin dzong Gyi k’eo-li c’ih-læ, hao yüong gyi ky’i tang lih-koh; yi yüong t’ih-kweng kwun-djü gyi-lah; ping-ts’ia nao djün-neng Jing-ming mang-mang ô-wông-go tsiu-tsô. ¹⁶ Læ Gyi go i-zông teng do-t’e-li yiu ming-z sia-tih, wô, VÆN-WÔNG-TS WÔNG, VÆN-CÜ-TS CÜ.

¹¹ 我又看见天开开，有一匹白马。骑的个主顾，叫勒忠信诚实。其审判等交战都是用公义。¹² 其眼睛像火光。其头戴许多冠冕。有名字写的，除其自之外人识得个。¹³ 其自穿染血个衣裳。其名字叫勒「神明个道」。¹⁴ 跟其个天上兵将都骑勒白马，穿洁白个细麻布。¹⁵ 有锋利个宝剑从其口里出来，好用其去

打列国；又用铁棍管住其拉；并且踔全能神明猛猛愠愠个酒榨。¹⁶ 来其个衣裳等大腿里有名字写的，话，万王之王，万主之主。

¹⁷ Ngô yi k'en-kyin ih-go t'in-s lih læ t'a-ying-li; gyi ziu do-do sing-hyang eo t'in-k'ong-li fi-go pah-tiao, wô, "Ng-lah jü-long tao Jing-ming-go do tsiu-yin læ; ¹⁸ s-teh ng-lah hao ky'üoh keh-sing kyüing-wông-go nyüoh, tsiang-kyüing-go nyüoh, ing-yüong-go nyüoh, mô teng gyi-mô cü-kwu-go nyüoh, wa-yiu cong-nying-go nyüoh; feh-leng do-do-siao-siao, tso nu-boh, feh tso nu-boh go."

¹⁷ 我又看见一个天使立来太阳里。其就大大声响讴天空里飞个百鸟，话，「尔拉聚拢到神明个大酒筵来；¹⁸ 使得尔拉好吃箇星君王个肉、将军个肉、英雄个肉、马等骑马主顾个肉、还有众人个肉；弗论大大小小，做奴仆、弗做奴仆个。」

¹⁹ Ngô k'en-kyin keh yia-siu teng di-zông-go kyüing-wông lin gyi-lah ping-tsiang, tu jü-long iao teng keh-we gyi-mô Cü-kwu lin Gyi-go ping-tsiang kao-tsin. ²⁰ Keh yia-siu be k'ô-ky'i, wa-yiu keh kô sin-cü-nying dong-de. Gyi ziu-z su-djông læ yia-siu min-zin tso gyi-z, mi-'ôh keh-sing ziu yia-siu-go ing teng keh-sing pa gyi ngeo-ziang cü-kwu go. Keh liang cü-kwu tu weh-go tiu læ liu-wông læ-tih dziah-go ho-k'ang-li. ²¹ Yü-to tu be Keh-we gyi bah mô go k'eo-li c'ih-læ-go pao-kyin sô sah-diao;" pah-tiao teh gyi-go nyüoh, long-tsong ky'üoh-pao.

¹⁹ 我看见箇野兽等地上个君王连其拉兵将，都聚拢要等箇位骑马主顾连其个兵将交战。²⁰ 箇野兽被掇去，还有箇假先知人同队。其就是素常来野兽面前做奇事，迷惑箇星受野兽个印等箇星拜其偶像主顾个。箇两主顾都活个丢来硫磺来的着个火坑里。²¹ 余多都被箇位骑白马个口里出来个宝剑所杀掉。百鸟得其个肉，拢总吃饱。

Mz. XX.

Ngô yi k'en-kyin ih-go t'in-s dzong t'in kông-lôh-læ, siu-li nyiah-leh m-ti-k'ang-go yiah-z teng ih-keng do-do lin-diao. ² Gyi ziu k'ô keh-go long, ziu-z lao-dzô, yia kyiao-leh Mo-kwe teng Sah-dæn, bo gyi ih-ts'in nyin, ³ tiu gyi læ m-ti-k'ang-li, kwæn gyi tsing, zông-deo kô fong-bi, s-teh feh we tsæ hong-yiu lih-koh, teng-tao keh ih-ts'in nyin mun-de; 'eo-deo iao dzæn-z sih-fông gyi.

我又看见一个天使从天降落来，手里捏勒底坑个钥匙等一根大大链条。² 其就拘箇个龙，就是老蛇，也叫勒魔鬼等撒但，缚其一千年，³ 丢其来底坑里，关其进，上头加封皮，使得弗会再哄诱列国，等到箇一千年满了；后头要暂时释放其。

⁴ Ngô k'en-kyin hao-kyi-go zo-we, teng keh-sing zo-tih-go cü-kwu; yiu sing-p'un-go gyün-ping s-peh gyi; yi k'en-kyin we-leh Yiæ-su-go te-tsing teng Jing-ming-go dao-li be tsæn-deo cü-kwu-go ling-weng, wa-yiu keh-sing feh pa yia-siu teng gyi ngeo-ziang, feh ziu gyi ing læ ngah-kôh-li 'ôh-tsia siu-li go cü-kwu; gyi-lah tu weh-tong, teng Kyi-toh dô-kô tso wông ih-ts'in nyin. ⁵ Yü-to si-nying m-neh weh teng-tao keh ih-ts'in nyin mun-de. Keh-z di-ih-tsao weh-cün-læ z-ken. ⁶ Væn-pah yiu-veng di-ih weh-cün-læ go cü-kwu yiu foh-ky'i, z sing-jün-go. Di-nyi-tsao si feh-neng-keo ling-djôh gyi: gyi-lah we tso Jing-ming teng Kyi-toh-go tsi-s, yi we teng Gyi dô-kô tso wông ih-ts'in nyin.

⁴ 我看见好几个座位，等箇星坐的个主顾；有审判个权柄赐拨其；又看见为了耶稣个对证等神明个道理被斩头主顾个灵魂，还有箇星弗拜野兽等其偶像、弗受其印来额角里或者手里个主顾；其拉都活东，等基督大家做王一千年。⁵ 余多死人旣得活等到箇一千年满了。箇是第一遭活转来事干。⁶ 凡百有份第一活转来个主顾有福气，是圣善个。第二遭死弗能够临着其。其拉会做神明等基督个祭司，又会等其大家做王一千年。

⁷ Keh ih-ts'in nyin mun-de, Sah-dæn we fông-c'ih lao-kæn, ⁸ ziu tseo-c'ih-ky'i hong-yiu t'in-s-pin-go lih-koh, ziu-z Kôh teng Mô-kôh, yi we jü gyi long-læ tang-tsiang: gyi-lah su-moh ziang hæ-li-go sô-nyi ka. ⁹ Gyi-lah tseo-zông pin-di-go kwông-kw'eh, we-djü sing-du-go ying-za teng c'ong-æ-go dzing-ts. Jing-ming ziu dzong t'in-zông kông ho lôh-læ, mih-diao gyi-lah. ¹⁰ Hong-yiu gyi-lah go mo-kwe be tiu-lôh læ ho teng liu-wông k'ang-li, ziu-z yia-siu teng kô sin-cü-nying tiu-lôh-kæn-go u-sen: gyi-lah we nyih-yia t'ong-kw'u üong-yün feh-hyih.

⁷ 箇一千年满了，撒但会放出牢监，⁸ 就走出去哄诱天四边个列国，就是谷等玛各，又会聚其拢来打仗。其拉数目像海里个沙泥介。⁹ 其拉走上遍地个广阔，围住圣徒个营寨等宠爱个城子。神明就从天上降火落来，灭掉其拉。¹⁰ 哄诱其拉个魔鬼被丢落来火等硫磺坑里，就是野兽等假先知人丢落间个乌碎。其拉会日夜痛苦永远弗歇。

¹¹ Ngô yi k'en-kyin ih-go shih-bah do zo-we, teng zo-tih-go Cü-kwu: t'in teng di tu bi-ko Gyi min-zin, ping-ts'ia m-c'ü k'o-yi hao deng. ¹² Ngô yi k'en-kyin si-ko-liao nying do-do siao-siao tu lih læ zo-we min-zin; ts'ah-ts tu t'æn-k'æ; wa-yiu ih-

peng, ziu-z weh-ming-go ts'ah-ts, yia t'æn-k'æ: si-go cü-kwu tsiao gyi-lah 'ang-we, ziu-z i ts'ah-ts-li sô sia-tih-go z-ken, tu ziu p'un-tön. ¹³ Hæ ziu kao-c'ih gyi li-deo si-go cü-kwu; si teng ^[1]veng-mo yia kao-c'ih gyi li-deo si-go cü-kwu; kôh-nying tsiao gyi-lah 'ang-we tu ziu p'un-tön. ¹⁴ Si teng ^[1]veng-mo tu tiu læ ho-k'ang-li. Keh z di-nyi-tsao si. ¹⁵ Væn-pah m-neh sia læ weh-ming ts'ah-ts-li go, yia tu tiu læ ho-k'ang-li.

¹¹ 我又看见一个雪白大座位，等坐的个主顾。天等地都避过其面前，并且旡处可以好庇。¹² 我又看见死过了人、大大小小、都立来座位面前。册子都摊开。还有一本，就是活命个册子，也摊开。死个主顾照其拉行为，就是依册子里所写的个事干，都受判断。¹³ 海就交出其里头死个主顾。死等坟墓^[1]也交出其里头死个主顾。各人照其拉行为都受判断。¹⁴ 死等坟墓^[1]都丢来火坑里。箇是第二遭死。¹⁵ 凡百旡得写来活命册子里个，也都丢来火坑里。

[1] 'ôh-wô, ing-kæn. 或话，阴间。（原注）

Mz. XXI.

Ngô k'en-kyin yiu ts'oh-sing-go t'in, teng ts'oh-sing-go di; ing-we zin-deo t'in zin-deo di yi-kying ko-de; yia feh tsæ yiu hæ. ² Ngô Iah-'en k'en-kyin keh-zo sing-jün dzing-ts, ts'oh-sing-go Yiæ-lu-sah-leng, dzong t'in-zông Jing-ming u-sen kông-lôh-læ, z yü-sin be-bæn, ziang sing-vu tsông-sih nying-tsih gyi nen-nyüing ka. ³ Ngô t'ing-meng t'in-zông yiu do-do sing-hyang, wô, "Ts'ia-k'en Jing-ming-go tsiang-bong læ nying-go cong-nyiang! Jing-ming we teng gyi-lah dô-kô deng; gyi-lah we tso Gyi-go pah-sing, Jing-ming Zi teng gyi-lah dô-kô læ-tong, tso gyi-lah-go Jing-ming. ⁴ Jing-ming we k'a-sao ih-ts'ih-go ngæn-li; yi-'eo tsæ-ve si," tsæ-ve sông-sing, tsæ-ve di-k'oh, tsæ-ve lao-kw'u; ing-we zin-deo z-ken yi-kying ko-ky'i-de."

我看见有簇新个天、等簇新个地；因为前头天、前头地已经过了；也弗再有海。² 我约翰看见箇座圣善城子，簇新个耶路撒冷，从天上神明乌碎降落来，是预先备办，像新妇装饰迎接其男姪介。³ 我听闻天上有大大声响，话，「且看神明个帐篷来人个中央！神明会等其拉大家庇；其拉会做其个百姓，神明自等其拉大家来东，做其拉个神明。⁴ 神明会揩燥一切个眼泪。以后再殮死，再殮伤心，再殮啼哭，再殮劳苦；因为前头事干已经过去了。」

⁵ Zo læ zo-we go Cü-kwu wô, “Ngô sing-zao væn-pah z-ken.” Yi teng ng wô, “Ng hao sia lôh: keh-sing shih-wô tu z cong-sing dzing-jih-go.” ⁶ Yi teng ngô wô, “Wun-de.” Ngô z Üô-leh-pô teng O-mi-kyüô, z ky’i-deo teng kyih-sah. Ngô we seph k’eo-k’eh-go cü-kwu bah-bah ky’üoh weh-ming-go shü-nyün. ⁷ Teh-sing-go cü-kwu we tsih-djôh væn-veh tso ts’æn-nyih: “Ngô we tso gyi-go Jing-ming, gyi we tso Ngô-go ng-ts. ⁸ Dæn-z keh-sing tæ-ky’iah-go, feh siang-sing-go, k’o-u-go, hyüong-siu, kæn-ying, yüong zia-jih, pa ngeo-ziang, teng long-tsong kô-go cü-kwu, gyi-lah tu yiu-veng læ ho teng liu-wông læ-tih dziah-go k’ang-li; ziu-z di-nyi-tsao si.”

⁵ 坐来座位个主顾话，「我新造凡百事干。」又等尔话，「尔好写落。箇星说话都是忠信诚实个。」⁶ 又等我话，「完了。我是亚勒巴、等阿米加，是起头等结煞。我会赐拨口渴个主顾白白吃活命个水源。」⁷ 得胜个主顾会接着万物做产业。我会做其个神明，其会做我个儿子。⁸ 但是箇星胆怯个、弗相信个、可恶个、凶手、奸淫、用邪术、拜偶像、等拢总假个主顾，其拉都有份来火等硫磺来的着个坑里。就是第二遭死。」

⁹ Keh ts’ih-go t’in-s nyiah-leh ts’ih-go hyiang-lu, ziu-z tsi-mun kyih-sah ts’ih-ying tsæ-næn go, gyi-cong ih-go tseo-long, teng ngô wô, “Hao læ, ngô we peh ng k’en keh-we sing-vu, ziu-z Siao-ying-go lao-nyüing.” ¹⁰ Ngô mong sing-ling ken-dong, gyi ling ngô tao ih-zo kao-do-go sæn-teng, peh ngô k’en Yia-lu-sah-leng, keh sing-jün do dzing-ts, dzong t’in-zông Jing-ming u-sen, kông-lôh-læ. ¹¹ Gyi yiu Jing-ming-go yüong-wô; gyi liang-kwông ziang ting kwe-djong pao-zah, ziang kwang-ts’ing-go pih-nyüoh. ¹² Gyi dzing-ziang yi do, yi kao; gyi dzing-meng yiu jih-nyi-dao; meng-k’eo yiu jih-nyi-go t’in-s; meng-zông yiu ming-z sia-tih, ziu-z Yi-seh-lih ts-seng jih-nyi ts-p’a-go ming-z. ¹³ Tong-pin, sæn meng; poh-pin, sæn meng; nen-pin, sæn meng; si-pin, sæn meng. ¹⁴ Dzing-ts yiu jih-nyi-da ziang-kyiah; gyi zông-deo yiu Siao-ying-go jih-nyi s-du ming-z læ-tih.

⁹ 箇七个天使捏勒七个香炉，就是𪔐满结煞七样灾难个，其中一个走拢，等我话，「好来，我会拨尔看箇位新妇，就是小羊个老娘。」¹⁰ 我蒙圣灵感动，其领我到一座高大个山顶，拨我看耶路撒冷，箇圣善大城子，从天上神明乌碎降落来。¹¹ 其有神明个荣华。其亮光像顶贵重宝石、像梗青个碧玉。¹² 其城墙又大、又高。其城门有十二道。门口有十二个天使。门上有名字写的，就是以色列子孙十二支派个名字。¹³ 东边，三门；北边，三门；南边，三门；西边，三门。¹⁴ 城子有十二埭墙脚。其上头有小羊个十二使徒名字来的。

¹⁵ Teng ngô kông-go t'in-s nyiah-leh kying-ts-go dzing-ts'ih iao liang keh-zo dzing-ts, teng gyi dzing-meng, teng gyi dzing-ziang. ¹⁶ Dzing-ts zo-lôh cün-fông, gyi dzing teng kw'eh ih-seh-s-ying. Gyi yüong dzing-ts'ih liang-liang dzing-ts, yiu ng-ts'in li. Dzing, teng kw'eh, teng kao, tu ih-ying-go. ¹⁷ Yi liang dzing-ziang, ih-pah s-jih-s ts'ah, tsiao nying-go liang-doh, ziu-z t'in-s-go liang-doh.

¹⁵ 等我讲个天使捏勒金子个丈尺要量箇座城子、等其城门、等其城墙。¹⁶ 城子坐落转方，其长等阔一色斯样。其用丈尺量量城子，有五千里。长、等阔、等高，都一样个。¹⁷ 又量城墙，一百四十四尺，照人个量度，就是天使个量度。

¹⁸ Dzing-ziang z yüong pih-nyüoh diah-dzing. Dzing-ts tu z ts'ih-kying ziang kwang-ts'ing-go po-li. ¹⁹ Dzing-ts-go ziang-kyiah tu z pao-zah tsông-sih. Di-ih-da ziang-kyiah z pih-nyüoh; di-nyi, ts'ing-nyüoh; di-sæn, ts'ông-nyüoh; di-s, ts'ong-nyüoh; ²⁰ di-ng, dzeh-'ong-nyüoh; di-loh, mô-nao; di-ts'ih, wông-nyüoh; di-pah, loh-nyüoh; di-kyiu, dæn-wông-nyüoh; di-jih, fi-ts'e; jih-ih, ts'ih-nyüoh; jih-nyi, ts-nyüoh. ²¹ Gyi jih-nyi-dao meng z jih-nyi-k'o cü-ts; kôh dzing-meng tu z ih-k'o cü-ts tso-go; zing-li-go ka-dao z ts'ih-kying, ziang kwang-ts'ing-go po-li.

¹⁸ 城墙是用碧玉叠成。城子都是赤金像梗青个玻璃。¹⁹ 城子个墙脚都是宝石装饰。第一埭墙脚是碧玉；第二，青玉；第三，苍玉；第四，葱玉；²⁰ 第五，杂红玉；第六，玛瑙；第七，黄玉；第八，绿玉；第九，淡黄玉；第十，翡翠；十一，赤玉；十二，紫玉。²¹ 其十二道门是十二颗珠子。各城门都是一颗珠子做个。城里个街道是赤金，像梗青个玻璃。

²² Li-hyang ngô m̃-teh k'en-kyin sing-din; ing-we Cü, djün-neng-go Jing-ming teng Siao-ying, Zi tso gyi-go sing-din. ²³ Zing-li yia hao-vong nyih-deo yüih-liang tsiao-djôh gyi; ing-we Jing-ming-go yüong-wô t'eo-c'ih liang-kwông læ; ping-ts'ia Siao-ying z gyi-go teng-tsæn. ²⁴ Keh-sing teh-kyiu-go koh-veng tu læ gyi liang-kwông li-hyang 'ang-dong; shü-kæn-zông wông-ti tu ta gyi-lah yüong-wô teng tseng-kwe tsing-læ. ²⁵ Gyi dzing-meng tsing-nyih feh kwæn; ing-we læ keh-deo m-neh yia-tao go. ²⁶ Lih-koh-go yüong-wô teng tseng-kwe, gyi-lah we ta-tsing-læ. ²⁷ Væn-pah feh kyih-zing, 'ôh-tsia tso k'o-u teng kô go cü-kwu, tu tseo-feh-tsing; tsih-yiu sia lôh læ Siao-ying weh-ming ts'ah-ts-li go hao tseo-tsing.

²² 里向我旣得看见圣殿。因为主，全能个神明等小羊，自做其个圣殿。²³ 城里也好留日头、月亮照着其。因为神明个荣华透出亮光来；并且小羊是其个灯盏。²⁴ 箇星得救个国份都来其亮光里向行动。世间上皇帝都带其拉荣华等尊贵进来。²⁵ 其城门整日弗关。因为来箇头旣得夜到个。²⁶ 列国个荣华等尊贵，

其拉会带进来。²⁷ 凡百弗洁淨，或者做可恶等假个主顾，都走弗进。只有写落来小羊活命册子里个好走进。

Mz. XXII.

Gyi yi peh ngô k'en weh-ming shü keh-da 'o, ziang se-tsing ka kwang-ts'ing-go, dzong Jing-ming teng Siao-ying-go zo-we liu-c'ih-læ. ² Gyi do-ka cong-nyiang, 'o-go liang-pin, yiu weh-ming jü, kyih ko-ts jih-nyi-cong, me yüh kyih gyi-zi-go ko-ts, gyi jü-go yih hao i keh-sing koh-veng-go bing. ³ Yi-'eo feh tsæ yiu tsiu-mô; Jing-ming teng Siao-ying-go zo-we læ keh-deo; Gyi nu-boh pih-ding we voh-z Gyi; ⁴ yi we k'en-kyin Gyi min-k'ong; Gyi ming-z yia læ gyi-lah ngah-kôh-zông. ⁵ Læ keh-deo m-neh yia-tao; hao-vong yühong-djôh teng-tsæn teng nyih-deo-go liang-kwông; ing-we Cü Jing-ming we kwông-tsiao gyi-lah; gyi-lah we tso wông tao shü-shü-dæ-dæ.

其又拨我看活命水箇埭河，像水晶介梗青个，从神明等小羊个座位流出来。² 其大街中央，河个两边，有活命树，结果子十二种，每月结其自个果子，其树个叶好医箇星国份个病。³ 以后弗再有咒骂。神明等小羊个座位来箇头。其奴仆必定会服侍其；⁴ 又会看见其面孔。其名字也来其拉额角上。⁵ 来箇头旣得夜到。好留用着灯盏等日头个亮光。因为主神明会光照其拉。其拉会做王到世世代代。

⁶ Gyi yi teng ngô wô, "Keh-sing shih-wô z cong-sing dzing-jih-go. Sing-jün sin-cü-nying-go Cü Jing-ming z ts'a Gyi t'in-s, pô kw'a iao ing-nyien z-ken kao-su Gyi nu-boh. ⁷ Ts'ia-k'en, Ngô soh-soh læ-gyi." Væn-pah pao-siu keh-peng shü-li sin-cü shih-wô go yiu foh-ky'i."

⁶ 其又等我话，「箇星说话是忠信诚实个。圣善先知人个主神明是差其天使，把快要应验事干告诉其奴仆。⁷ 且看，我速速来其。」凡百保守箇本书里先知说话个有福气。」

⁸ Ngô Iah-'en k'en-kyin t'ing-meng keh-sing z-ken. Kyi-jün t'ing-meng k'en-kyin, ziu boh-tao gyi kyiah-'ô, iao pa-pa ts-tin keh z-ken go t'in-s. ⁹ Gyi teng ngô wô, "S-feh-teh; ngô teng ng, lin ng hyühong-di keh-sing sin-cü-nying, wa-yiu siu keh-peng shü-li shih-wô go cü-kwu, tu z dong-z-go nu-boh. Ng pa Jing-ming, z-de."

⁸ 我约翰看见听闻箇星事干。既然听闻看见，就伏倒其脚下，要拜拜指点箇事干个天使。⁹ 其等我话，「使弗得。我、等尔、连尔兄弟箇星先知人、还有守箇本书里说话个主顾，都是同事个奴仆。尔拜神明，是了。」

¹⁰ Yi teng ngô wô, “Feh-k’o fong-hao keh-peng shü-li sin-cü-go shih-wô; ing-we gyi z-‘eo gying-de. ¹¹ Peh-yi cü-kwu, dzing-gyiu peh-yi; u-ŵe cü-kwu, dzing-gyiu u-ŵe; kong-yi cü-kwu, dzing-gyiu kong-yi; sing-jün cü-kwu, dzing-gyiu sing-jün. ¹² Ts’ia-k’en, Ngô soh-soh læ-gyi; pih-ding yiu pao-ing,” tsiao kôh-nying-go ‘ang-we ka pao gyi. ¹³ Ngô z Üô-leh-pô teng O-mi-kyüô, zin teng ‘eo, ky’i-deo teng kyih-sah.”

¹⁰ 又等我话，「弗可封好箇本书里先知个说话；因为其时候近了。¹¹ 不义主顾，仍旧不义；污秽主顾，仍旧污秽；公义主顾，仍旧公义；圣善主顾，仍旧圣善。¹² 且看，我速速来其。必定有报应，照各人个行为介报其。¹³ 我是亚勒巴、等阿米加，前等后、起头等结煞。」

¹⁴ “Siu Gyi ‘ao-ling go cü-kwu yiu foh-ky’i, s-teh gyi-lah k’o-yi yiu-veng weh-ming-go jü, k’o-yi dzong meng-k’eo tsing dzing. ¹⁵ Nga-deo yiu ôh-keo, zia-jih, kæn-ying, hyüong-siu, pa ngeo-ziang go, teng væn-pah hwun-hyi kô z-ken, yi ky’i tso go cü-kwu.

¹⁴ 「守其号令个主顾有福气，使得其拉可以有份活命个树，可以从门口进城。¹⁵ 外头有恶狗、邪术、奸淫、凶手、拜偶像个、等凡百欢喜假事干、又去做个主顾。」

¹⁶ “Ngô Yiæ-su yi-kying ts’a Ngô t’in-s te-tsing keh-sing z-ken peh cong kyiao-we. Ngô z Da-bih-go keng-cü, teng Gyi-go ‘eo-dæ, keh-lih ming-liang-go ng-kang-hyiao.”

¹⁶ 「我耶稣已经差我天使对证箇星事干拨众教会。我是大辟个根株、等其个后代，箇粒明亮个五更晓。」

¹⁷ Sing-Ling teng sing-vu tu wô, “Hao læ.” T’ing-meng-go cü-kwu yia iao wô, “Hao læ.” Væn-pah k’eo-k’eh-go cü-kwu hao læ. Z iao-go cü-kwu, hao bah-bah ky’üoh weh-ming-go shü.

¹⁷ 圣灵等新妇都话，「好来。」听闻个主顾也要话，「好来。」凡百口渴个主顾好来。是要个主顾，好白白吃活命个水。

¹⁸ Ngô teng væn-pah t’ing-meng keh-peng shü-li sin-cü shih-wô go cü-kwu tso te-tsing, ‘Ziah yiu nying kô-zông keh-sing shih-wô, Jing-ming yia we kô-zông keh-peng shü-li sia-tih-go tsæ-næn peh gyi. ¹⁹ Ziah yiu nying kæn-lôh keh-peng

shü-li sin-cü-go shih-wô, Jing-ming yia we kæn gyi lôh, læ weh-ming ts'ah-ts teng sing-dzing-li, lin keh-peng shü-li sô sia-tih-go hao-c'ü, feh hyü gyi yiu-veng.'

¹⁸ 我等凡百听闻箇本书里先知说话个主顾做对证：若有人加上箇星说话，神明也会加上箇本书里写的个灾难拨其。¹⁹ 若有人减落箇本书里先知个说话，神明也会减其落，来活命册子等圣城里，连箇本书里所写的个好处，弗许其有份。

²⁰ Te-tsing keh-sing z-ken Cü-kwu z-ka wô, “Ngô jih-dzæ soh-soh læ-gyi. Üô-meng.” Dæn-nyün Ng Cü Yiæ-su hao læ.

²⁰ 对证箇星事干主顾是介话，「我实在速速来其。亚们。」但愿尔主耶稣好来。

²¹ Dæn-nyün Cü Yiæ-su Kyi-toh-go eng-we ling-djôh ng-lah cong-nying. Üô-meng.

²¹ 但愿主耶稣基督个恩惠临着尔拉众人。亚们。

SING-IAH DJÜN-SHÜ-GO CONG

新约全书个终